

重修威縣志

第捌冊

威縣志卷十一

人物志中

鄉賢

說文云賢多財也蓋富家翁也自財本或作才而賢字之資格進矣自玉篇云賢有善行也而賢字之資格益進團團富家翁不得借濫矣且古文多以叟字爲之漢校官碑親叟寶智又師叟作朋國三老袁良碑優叟之寵是也鄉賢者桑梓名德歷久而稱道弗衰所謂鄉先生歿而可祀於社者其此之謂與前清禮部則例云凡直省府州縣文廟左右建鄉賢祠以祀本地德行著聞之士地方官春秋致祭又大清會典云凡崇祀鄉賢之禮縉紳處士積學力行垂範鄉里者歿後三十年由學校師生公舉以達州縣州縣以達督撫學政於八月具疏部加覆覈歲終彙疏以聞列祀鄉賢祠中民國則由縣呈道而省長而內務部而大總統覈准施行其慎重如此昔周置鄉師非鄉望允當衆心者不得預焉今之鄉賢亦非鄉望允當衆心者不得預也

元

劉肅字才卿威州洛水人父深贈昭文館大學士邢國公諡康穆

錢大昕元史考異

肅金興

定二年詞賦進士嘗爲尙書省令史時盜內藏官羅及珠盜不時得逮繫貨珠牙僧及藏吏誣服者十一人刑部議皆置極刑肅止之曰盜無正賊殺之寃金主怒有近侍夜見肅具道其旨肅曰辯折寃獄我職也惜一己而戕十一人之命可乎明日詣省辯愈力右司郎中張天綱曰吾爲汝具奏辯折之奏入金主悟囚得不死調新蔡令先時縣賦民以牛多寡爲差民匿不耕肅至命畜繁者不加賦民遂殷富瀕淮民有竄入宋境籍爲兵而優其糧間有歸者頗艱於衣食時出怨言曰不如渡淮告者以謀叛論肅曰淮限宋境一水耳果欲叛不難往也口雖言而心無實準律當杖八十奏可繼擢戶部主事金亡依東平嚴實辟行省尙書左司員外郎又改行軍萬戶府經歷東平歲賦絲銀復輸綿十萬兩色絹萬匹民不能堪肅贊實奏罷之世祖居潛邸以肅爲邢州安撫使肅興鐵冶及行楮幣公私賴焉中統元年擢眞定宣撫使二年授左三部尙書官曹典憲多所議定未幾兼商議中書省事三年致仕給半俸

四年卒年七十六肅性舒緩有執守嘗集諸家易說曰讀易備忘後累贈推忠贊治功臣榮祿大夫上柱國大司徒邢國公諡文獻子憲禮部侍郎慈大名路總管孫庶翰林學士承旨自有傳

節元史本傳

劉賡字載熙洛水人五世祖逸以郡吏治獄有陰德祖肅爲右三部尙書賡幼有文名師事翰林學士王磐至元十三年用薦者授國史館編修官十六年拜監察御史是時御史中丞崔彧好盛氣待人他御史拜謁彧平受之獨見賡則待以上客大德二年陞翰林直學士六年奉使宣撫陝西至大二年遷禮部尙書仍兼翰林學士尋拜侍御史頃之兼國子祭酒國學故事伴讀生以次出補吏莫不爭先出時有一生親老且貧同舍生有名在前者因博士以告曰我齒頗少請讓之先賡曰讓德之恭也從其讓別爲書薦其人朝廷反先用之自是六館之士皆知讓之爲美德也皇慶元年遷集賢大學士仍兼國子祭酒六年拜太子賓客七年復入集賢爲大學士泰定元年加光祿大夫天歷元年卒年八十一賡久典文翰當時大製作多出其手言語字畫人寶而敬之耆年宿德爲朝廷推重云

元史本傳參虞集道園考古錄

明

李九思洪武初以明經辟任本縣儒學經明行修文學優達教法嚴悉士多成就嘉靖五年舉祀鄉賢議得九思以布衣抗顏爲本學教諭使其同鄉之人心悅誠服莫不執弟子禮非其行詣學政有大過人者何以得此況不獨當其生時人無間言至今談者想聞其風猶有興起者焉則豈但歿而可祭於社也耶

齊志

張翥由歲貢任監察御史剛直著聞陞福建按察司副使

郭瑀永樂十八年舉人任戶部主事籌量國計出納維允陞刑部郎中門無私謁理

冤獄錄繫囚多所裨益時人以三清目之子銓進士

齊志參分省人物考

傅海父喪廬墓虎至此之曰我爲父母死何懼虎卽去有司爲之請旌

畿輔通志

按明史孝義傳云景泰間被旌者則有成安張憲威縣傅海是此人已載正史也或曰獸之凶猛者莫過於虎海何人斯能叱之卽去歟然吾觀明史所載邱鐸廬墓山深多虎聞鐸哭聲輒避去謝定住虎齧其母取石擊之虎乃舍去包實夫途中遇虎實夫拜請曰吾被食命也如父母失養何虎卽舍去後人名其地爲拜虎

崗蘇奎章從父入山猝遇虎奎章泣告願舍父食己虎曳尾徐去據此則虎雖凶
猛不食孝子固數見不鮮也獨何疑於傅海古人謂至孝格天又謂信及豚魚豈
不然哉

王濟字克深成化二年進士任監察御史巡按陝西山東蘇松常鎮等處所至有聲
其按蘇松時值隆冬濟河民多凍死濟奏止之全活者無算累官南京都察院右僉
都御史巡撫甘涼提督鄖陽荆襄等處練兵儲糧民安盜息卒於官時兵部尚書王
鉞氣岸嶄然少所許可嘗爲詩以贈濟有學海洗清三省地筆鋒撐住半邊天之句

分省人物
考參明史

郭銓成化五年進士任戶科給事中志高行潔性敏學勤當官三事咸無愧章上悉
舉行方將大用卒於官識者惜之

舊志

董威字德隅登成化二十二年費宏榜進士任南京戶部郎清慎自持陞江西參議
平心應物安重不擾時劉瑾擅權達官多納賄交歡威獨以剝民取寵爲恥瑾乃矯
詔罰遣輸粟居庸至罄囊橐了無怨色尋轉貴州參政卽上章求去優游林下二十

餘年君子稱其急流勇退焉

舊志參攷
輔人物考

王育英宏治二年舉人任江南建平知縣以賢能改績溪持身有法薦剡交上因親老乞終養非公事不見邑宰年九十有七卒鄉評謂居官無污居鄉無議有德獲福

云

舊志

石永字壽卿嘉靖十一年進士授中書舍人歷雲南河南山西道御史巡按四川所至悉心咨訪秉公勸懲有豪強畏罪伏刺客於永所過之橋下永至其人忽心痛作聲執訊得實蓋鬼神默佑之也二十四年掌計典謝絕私交不通關節出知南陽府尋以事降濱州州判怡然就任升南京太僕寺丞知平陽府藩府競訟累年不決永委曲開導訟乃息太宰張潤稱其風寒貴戚威寢權豪戊辰遷陝西副使駐甘州見草木蕃盛詢知舊爲水田以地震泉涸遂求濬其泉五十餘處灌田八百餘頃流亡者爭復業進右參政視涼州地宜耕募民懇闢兼導泉以灌溉甘涼人德之擢陝西按察使累遷至都察院右僉都御史巡撫延綏革冗役禁包占懲負販養勇敢謹問諜飭將練兵有點虜犯灰條溝前後斬首級獲駝馬器械甚衆疊蒙金幣之賜凡三

任朔方歷九年民戴之尤深乙未升兵部左侍郎總督湖廣川貴等處凡事務責實效不爲文具猺賊沈雅等勢猖獗督將士擣其巢於淑浦縣龍澤等洞捷聞賜金幣方隅晏然時督撫請調葉麻等司兵禦倭永上疏極論不便乞免以安地方省糧餉蒙俞旨著爲令三十九年召爲戶部左侍郎瀕行疾卒副使李心學爲歛具啓其槩無餘積咸嗟嘆之自明二百餘年郡學祀鄉賢者公一人而已又祀邑鄉賢祠

分省人物

考畿輔人物
考參舊志

按歲寒老人曰石公不獨興地利平賊寇是功業而風寒貴戚威寢權豪訟息民安其功業當更溥耳張太宰知公夏峯先生更知公也

賈民母卒時年十九未娶俗有奪吉成婚者家人亦欲從俗民哭曰居喪而娶非禮也忘母而婚非孝也卒不從及葬廬墓三年服闋始娶人稱其孝後次子待問貴顯公六受贈馳人以爲孝德之報

舊志

賈待問字學叔隆慶二年進士知咸寧縣當省會案牘山積迎刃而解又清兼并之稅五千餘頃治聲流聞擢給事中糾劾不畏彊禦再疏論劾馮璫聲震中外出守懷

慶城西沁水爲患疏而濬之築長隄以障其衝人稱爲賈公隄改守松江松中倭寇日深困於兵食爲裁宥役請帑金代墾境內閒田累遷湖廣布政拜都察院右僉都御史巡撫南贛疏通鹽法巡撫甘肅值火酋套虜合寇莽捏二川設伏擒斬無算招降番族八百有奇虜失右臂改撫陝西時當竄夏兵變歲復不稔多方拊噢稍得蘇息是秋防虜移駐河湟調度遮擊斬首二百級招降六千餘虜西逸詔晉右都御史巡撫如故松山在河西塞外爲羌虜要地小酋賓盤踞三十餘年待問會制府集七路之師分道出擊恢復疆土羌虜道絕晉兵部尙書巡撫如故久之火酋復入寇遣將戰於節子崗斬首虜二百有奇進太子少保居陝八年德教浹洽稅使梁永恣其僕從剝民財物多殺無辜上疏劾狀逮其人付之重典梁請於四鎮稅馬待問亟疏陳其不可遂寢壬寅十月以寒疾卒享年八十陝人軍民悲惋如失所天云

陝西通志
參威

縣志
畿輔
人物考

按賈公疏劾梁永再劾馮璫當時固殿上虎也夏峯先生謂劾馮璫一事尤想見風采而一般無學之人多有謂其讒事分宜者姑無論獻媚權貴公所不爲卽以

時代而論公中隆慶二年進士其歷官皆在萬歷朝分宜爲宏治十八年進士嘉靖十八九年氣燄漸熾二十一年始爲武英殿大學士預機務從此攬權納賄萬惡畢作四十一年即一敗塗地老而死矣此時公猶未通籍至其登第尙隔六年安所得分宜而攀附之哉甚矣其無稽也

高聰由舉人任順天大興縣丞保陞本縣知縣厲廉明執法度不阿權貴不畏強禦門無私謁案無留牘時論比之包龍圖超升山東東昌府知府

舊志

張鑾由歲貢任山西陽曲縣主簿陞本縣縣丞有操守有才幹築堡寨儲糗糧固邊保民足兵攘外立心平實始終一節

同上

王建極字素徽家貧力學登天啓五年余煌榜進士侍經筵稽古陳謨適合上意賜白金文綺以親老乞養歸里崇禎戊寅清兵陷城死焉

同上

清

劉調贊字用可號鼎臣童牙讀書卽有志於聖賢弱冠補諸生文章書法噪於一時而已則欲然若不足一日讀顏習齋四存編喟然曰此周孔正傳也時習齋已歸道

山李剛主講學濂于學舍門墻甚盛調贊曰習齋雖物故剛主卽其替人師剛主卽師習齋矣乃倩其友白任若爲介執贊剛主門下剛主深器之舉凡身心之得失學術之真僞治法之升降口講指畫悉以相付又贈書十餘卷如尼山之得淵騫然歸約同志數人組一學會習藝謀道努力媵修又立實學會約遵守無失二十餘年如一日平生著述甚夥曰學樂錄曰學禮儀注曰杖溪文集杖溪詩集曰平于問答錄曰萬年垂拱治平策策中條目一崇道德二均井田三稽人民四建鄉官五興學校皆煌煌大謨也海寧陳文勤公讀而歎曰周孔學教三代治法悉備於是此何異江都天人三對乎又曰先聖之道得恕谷而益明恕谷之學得用可而益彰也書問稠疊備極推挹錢香樹侍郎督學畿輔時索其撰著調贊謙讓未遑旣而見其治平策乃瞿然曰天下竟有此奇人竟有此奇書奇極奇極於是以白綾一幅大書閣修二字贈之其爲賢士大夫所引重如此乾隆九年卒于家年僅四十五歲門人私諡曰文敏先生其羣從中有名若愚者能世其學著有日記藏於家又有申學淵者字顏儒調贊之高足也亦能傳顏李之學

按先生學宗顏李上承列聖之心法固道德家也及觀其治平萬年策則皆經世大略又政治家也陳錢二公知先生不可謂不深然卒不能薦揚於朝大展其用致使青衫一領困頓終身向所謂相知者是耶非耶或疑先生生當叔季一意束縛於禮法實行之中尺寸不敢踰越母乃迂甚然余觀其日記見其有時搬笛有時習刀有時鼓琴高唱一江風及楚江晴諸曲則先生固活潑潑地人也何迂之與有若欲避今人之所謂迂則必毀道裂德唾周罵孔視權利如性命以險詐強橫無恥爲天職而後謂之不迂也嗚呼豺狼滿地鬼蜮橫行安所得人而與之語哉安所得迂如先生者而與之語哉

又按舊志鄉賢門中以宋侍郎李若水居首考宋史本傳若水曲周人非威人也廣平府志引一統志謂威至唐省入曲周宋後置尋廢若水死靖康之難時威爲曲周地若水未必非威人也故曲周載之威亦載之云云然若水故里名水德堡在今曲周城東十八里子孫聚族而居土人靡不知之其非今之威縣人固彰彰也一統志之言無徵不信周大令輝遠亦云然今特削之不敢妄爲援引也

隱逸

仕宦熱中吾國之溫度特高外人諡爲官國良有以也民國創建乃達焦點焉科舉誠秕政也選舉信良法也而吾國之選舉無不出以鑽營而偏美其名曰運動於是最高運動議員運動下至於一局一所有權利之地位亦無不大施其運動或以酒醴或以金錢或以武力明目張胆縱情直行狗苟蠅營廉恥喪盡舉古人所不屑爲者無不毅然爲之羣然爲之苟不出此雖品如周孔無人過問苟出於此雖行同躑躅靡不歡迎故其人愈闊其行愈劣其位愈高其品愈低蓋行不劣者人必不能闊品不低者位必不能高也嗚呼全球五十餘國大千無量數世界問復有此汙濁社會乎而誰其隱乎而誰其逸乎然此就民國而還言之也昔吾有先正其隱璞匿輝含貞養素者固大有人在今雖時移世易高風云遙而其秕糠將相泥塗軒冕之氣概猶可想見也不知今之要人熱客對此作何論調耳余編纂至此友人見之咲曰要人熱客之論調我知之矣其言曰腦筋太舊不達時務

唐

潘師正貝州宗城人少喪母廬墓以孝聞事王遠知爲道士得其術隱居逍遙谷高宗幸東都召見問所須對曰茂松清泉臣所須也既不乏矣帝尊異之詔卽其廬作崇唐觀及營奉天宮又敕直逍遙谷作門曰仙遊曰尋真時太常獻新樂帝更名祈仙望仙翹仙曲卒年九十八贈大中大夫諡體玄先生

新唐書本傳

明

賈同芳字野堂由父太保公邊功授錦衣衛西司房理刑百戶天啓中六君子殉難刑罰不中時事日非同芳深以溺職爲憂遂請告終養後屢承徵召不起所著有文章正宗鈔行世

舊志

賈廕芳字濟堂同芳介弟也時稱元方季方云性高尚山人墨客座上常滿達官貴人反格一見盧九臺備兵保定道經威境慕其名先投刺廕芳但作草書數紙贈之盧歎曰賈公竟一見不可得乎其傲岸如此

舊志

賈良翰字景宏禮部儒士工書畫古篆尤爲精絕居京邸紙價增焉無何厭長安煩囂請假歸里詩酒自娛有廣騷集續高士傳行世

舊志

清

董龍舊志載其事蹟未詳特附於此

耆舊

昔習彥威著襄陽耆舊記鳳林鹿門之間名流碩彥搜羅靡遺而其人於以千古不然魂魄一去早同秋草矣誰猶緬仰前徽而寄其遐思哉吾威地處河朔風俗敦龐老成典型猶未盡泯其前言往行實有可以儀式後人者著之邦乘不勝高山仰止之思焉

明

王向明林泉養望高尚其志知縣龍納銘嘉其名德敦請鄉飲旌其門曰採芝植槐知縣李之棟贈絹米肉帛旌其門曰媲美香山行年九十歲猶強健自如

舊志

孫奕世字叔立號慕溪爲人純篤質諒言動不苟其行已端方若凜然難犯然與人未嘗有忤尤深明義利之辨至於服官一介必嚴嘗奉委採買市貨便道過里有巨商以千金求爲先容託所親來餽密置牀下而去公覺亟追還之所親亦不敢強及

守興安操持愈謹子孫恪守家法稱德門焉

上全

王維寧字懷德達魯花赤威州守伯大之八代孫以舉人爲河南溫縣令二年謝政歸板輿奉母林下承歡者二十年絕跡不至公庭近世仕宦尤莫能及

上全

王猷昌字恬如平生仗義負氣遇不平事輒明目張膽不恤毀譽攘臂力爭及登仕籍剛方如故以不善事上官急流中遂懸車焉

上全

李向日字緘銘爲人剛正遇事有執持應人接物全不依違兩可風骨稜稜有不可犯之概人或嫌其不能包荒然而杜絕請謁痛拒比匪實近人所難

上全

張文星字明吾老年有子無孫因訂劉氏女爲其子選室娶有日矣子乃生子文星邀劉氏至家謂之曰吾聘令媛爲吾家婦者爲無孫也今吾抱孫矣願令媛另行擇配聘金絕不索還也劉氏深感之叩謝而去嗣連得四孫人以爲行善之報其族人有名異者官外郎亦有盛德嘗繫牛街衢凡里人之貧者任其用以耕田又施義塚一區凡貧而無葬域者任其埋骨此間白楊衰草荒塚累累過之者咸稱其厚德焉

上全

張嘉猷字試吾生而穎異幼有至性以父母年當遲暮除溫清外日夕攻苦誦讀不輟故年未弱冠卽聲俊一夔親歿後絕意仕進掛帳里門教授鄉邦子弟至於族中貧乏有婚喪不能舉者悉爲出資經理足跡不入城市者殆數十年人皆以隱君子稱之工楷書邃於經術所著有周易講意易經要旨等書行世

上全

賈守城經史淹貫一衿終身授徒里閭孜孜不倦諸生有貧窘者給以燈火資其夜讀伊吾之聲徹於通衢用是夔序之英半出其門邑人無論少長皆稱達齋先生至其清操質行朴貌古心當於古人中求之壽九十二歲夔鑠善飯精神不衰蓋福德兼全者

上全

李文星字念韋高才力學中歲僅博一第筮仕爲山東日照令政績流聞其邑有巨奸以文星不便於己也乃以陰計中傷之文星遂束裝歸歸則自開一墅讀書樂志不與邑宰通日偕二三知己摘詞醉月而已邑宰求爲鄉飲賓不獲已再應之後卽造廬敦請避弗與接所著有明詩註釋藏於家

上全

孫蒼字毓寰博聞強記議論風生人有質以疑義者必原始要終縷縷述之雖胡宿

之答文忠不啻焉一聞求田問舍之言輒掩耳避去座客常滿尊酒不空大有北海之風後以司訓卒於唐縣諸學子服其德教心喪三年復有龐鴻儒者制行端嚴一

介弗取均爲鄉國所推重云

上全

石侍皇字匪石司徒永之孫少有才名閉戶讀書性懶交遊以選貢任山西汾州府

司理蒞任甫半載因秉性高潔不合時宜遂棄職歸田以自終焉

上全

姜志董欽趙信孫永胤舊志所載事蹟未甚詳特附於此

清

劉廣玉字顯我生而岐嶷文章行詣士林重之家素饒裕好行其德施藥療疾置義塚以瘞骸骨爲諸生四十年未常以私事至公庭督學程某以六行兼備表其門子

派久循吏有傳

舊志

賈良吏善楷書嗜吟咏行詣茂著督學程扁表其門蓋亦一時之佳士也

舊志

田如龍字夔菴十歲失怙同里劉調贊倡顏李之學如龍聞而慕之因亦執贄恕谷門下砥德考道敦本尙實居母喪時準今酌古悉如禮服闋後時祭月薦必誠必敬

數十年不稍間家貧從游數十人餽以金嚴拒之曰余壽人豈爲利乎值歲歉友人餽穀數石如龍曰囊中無長物腹內有餘閒固卻弗受晚年窘愈甚而安貧樂道之念彌篤有縣令某聞其賢欲如龍往見之如龍曰是欲屈吾道也卒不往

王振嗣字昌祖上舍生也道光初元里人王洛校以白蓮教術倡其徒從之者十室而九振嗣多方譬解以利害悚之卒不聽乃以俚語作爲彈詞詬訾之談諧痛快多可軒渠者族兄佐善阮咸每值暇日坐巷口古槐下一弄絃索一搥小羯鼓自唱其所作彈詞聲琅琅滿街衢至夕陽西下乃已諸教匪銜之刺骨無何而王邦彥事起王邦彥者鉅鹿諸生也時其鄉亦多教匪演劇聚徒衆大頭目高坐如王者諸僞官冠珊瑚頂北面拜跪呼萬歲邦彥憤之走京師欲上其事一日游茶肆中遇一客談甚洽其人言帝京風物天下得未曾有邦彥曰吾鄉中亦有帝王亦有百官何渠不若其人遽問所以因具述教匪不法事甚悉其人默默去已而緹校大至擁邦彥去始知其人卽某親王也於是遂聞於朝天子召見垂問以知縣試用嚴旨下保陽制府命捕治鉅鹿教匪而王洛校卽其黨與也名亦在捕中遂誣振嗣爲教魁蓋必欲

甘心焉振嗣被逮至省制府親鞫之坐密室中參佐咸在不數語知爲端士因又詢及被誣緣起振嗣卽朗誦其所作彈詞制府鳴掌大咲諸參佐和之爲圓堂焉乃釋使歸里今其所作彈詞鄉人猶能記憶而傳唱之

鄉志

尙文莊字蒞然性慈廉好濟人急雖田無一稜每代人償值不少各有遠商驅車過城中誤觸賣麩麩者大爲所窘弗使去文莊予以錢商始得去又嘗與某富翁善富翁銜其族中無賴子意必致之死乃持交子錢倩文莊運動官府爲之道地文莊陽諾之即以交子錢付無賴子俾治生且曰富翁意也無賴子信之匍匐謝富翁門口中作自怨語喃喃不休遂改行焉富翁亦自悔甚此二事皆鄉人述之而文莊未嘗舉以告人也

張致和字育萬兄名致中以納贖爲國子生少不事事分爨後益無聊賴鬻其所得產殆盡尋以疾卒其子泰亦卒泰之妻別適人遺一孤孫曰家駿年甫數齡致和收養之家駿患頭瘡白痴層層腥穢不可近致和爲洗滌之數年始愈及稍長好從諸博徒遊致和約束綦嚴督教聲怒詈聲鞭笞聲聞於庭久之家駿亦改行焉致和

遂爲娶妻析己產之半以予之致和美鬚博大音聲誠恐有幹局里中有大喪葬必聘爲主辦其早往後罷似陳曲逆當發引時觀者雲集其部勒賓客子弟陰以兵法如古名將提百萬師指揮無不如意者又令人憶項梁當年以是一鄉推爲祭酒焉

鄉土志

張光耀字振遠膂力過人善射球子中式乾隆戊子科武舉官江蘇常州府白糧廳守備晚年謝政歸田天性極友愛事兄廣耀如父兄弟析爨時廣耀已前卒光耀以美宅一區中有五層高樓連雲碍日讓於其嫂曰吾宦遊江左失慎倉焚家中變產償官吾累吾兄多矣今以此樓爲嫂作菟裘所以報吾嫂卽以所以報吾兄也其篤誠如此

劉鳳山字來儀武孝廉也時有教匪張善繼起於邱縣之邵家莊擾及威境鳳山所居曰徐村至城十五里村人從匪者有九人之多一日率其徒黨入村焚掠受禍者凡數十家鳳山高閻峻宇匪不得入乃守其門戟手罵不止勢凶甚鳳山密遣其群從名星燦者潛從別戶出怒馬至城是時勝大臣克齋督師駐城中星燦面見勝大

臣具言匪狀勝大臣當即派馬步一營隨星燦馳至徐村則匪正以利刀斫門門已破矣於是掩其不備匪衆全屬就獲無得脫者一時無不稱快焉未幾流寇楊蓬嶺繼張善繼而起蹂躪徧畿南罔邑鄉團成立鳳山被舉爲團長籌畫防禦備極勞悴自此匪黨斂跡一方慶安謐焉子夢曾候選縣丞居家孝友夢協邑諸生孫秉書秉德秉元亦皆諸生

李銑字有光黑夜至麥場遇素與有釁之人置火種於其麥垛之下意將火之也銑曰爾何得冷箭害人如爲貧也獨不可告我乎何如此左計明日與米數升勸令改行語云怨可解而不可結銑知之矣

尙廷謨字君訪太學生也咸同間教匪張善繼連陷邱縣清河曲周等城羣情大駭濶沐征佞者率逃去廷謨以理喻之衆稍安故賊至百計環攻卒不得一逞遂以守城功蒙獎六品銜先是有知縣李鈞善者以徭役激民變衆萬餘叫囂牙門前知縣大怒持短刀坐堂皇上逼羣吏發火銃擊之廷謨暗戒持銃者發皆斜上但嚇之使退而已切弗傷人由是全活無算而知縣亦不致獲大譴其慈良而有幹局類如此

少時家赤貧拮据謀生養親之外以餘貲爲弟廷俊從師費弟後登賢書作令江西有循聲子希賓亦光緒壬寅科舉人

高陽才字愷甫廩貢生也文章書法著稱一時教匪之亂揚言將攻邑城人情惶惶莫知所措陽才與尙紳廷俊首倡城防支配之法按戶編緝門勇以爲守禦計籌備甫就而教匪大至圍攻十餘日城幾陷陽才與尙紳晝則校巡城上夜則匿壞堞間督率門勇下燈籠於城垣外視匪稍近輒以火銃擊之或以一矢相加遣而匪卒未得逞城以無恙事定後以異常勞績列保案尙紳以知縣分發江西陽才賞六品銜試用訓導同治五年補缺甯津未至任而卒年甫三十有七子步蟾光緒甲午舉人別有傳

王耀庭字蓋臣道光己酉選貢少從廣宗鄭松峯游及松峯撫汴屢書招之以親老弗往也同治初元流寇煽亂驚剽閭里耀庭與其子化成畫禦寇之策築砦掘塹招集丁壯教以步伐止齊旗影絳天礮彈聲浪傳數十里外寇相戒不敢犯同治十一年大順廣道札催各州縣紳耆葺治書院威縣書院久圯頽垣敗屋庭草沒人耀庭

奉委首先捐貲爲一邑倡不數月而百堵落成學廬講舍煥然一新遂乃聘惇師招髦士一時之鼓篋而來者閭閻秩秩從前所未有也卒年八十有九

鄉志

李長楨字維周先世自金陵徙居畿南遂爲威縣人恩貢生也母病十餘年長楨晝夜侍側稍有不適爲按摩之轉側屈伸必扶掖之惟恐不得當母憫其勞假寐冀其稍息長楨亦假寐靜聽之聞聲卽起曰安乎欲飲食乎有所需乎十餘年如一日生平喜閱理學書如叢山人譜呂新吾呻吟語陳榕門五種遺規孫夏峯理學宗傳之類皆深嗜不厭擇其精粹者抄黏壁上皆滿自所著書有教家瑣言暮年提命若干卷大抵以寡過戒欺爲宗旨晚年兩耳重聽猶殷殷戒其子弟云爾輩宜爲善士不必學爲名士宜爲正人不必求爲貴人其立品概可知矣卒年七十八歲

李光瀛字仙卿平生靜默寡言故又字子訥文章得陰柔之美酷肖其人清光緒丁酉舉順天鄉試客於廣平郡署時郡守爲西林岑春煦襄勤公毓英之仲子雲階總裁之兄也將家子出身接人粗厲少和氣乃爲光瀛之靜氣所降服兩人竟雅相得未幾薦爲臨洺書院主講岑守去任後光瀛亦辭講席而歸暮年避亂居城中猝嬰

末疾因亦不起卒年七十三歲

路東壁字書府邑諸生讀書略觀大意不沾沾於章句之末持躬端嚴其約束子弟教授生徒皆有法度鄉人有爭訟事東壁居間排解卽強橫之徒亦無不降心讓步言歸於好蓋有魯仲連之風焉

劉廷鉞字含鶚軀幹雄偉姿貌嚴厲而性極和柔同治甲戌武進士也登第以後無所事事蓋夤緣權貴與夫金錢運動皆不屑爲也畿南風氣凡武人之不得志者往往招聚博徒而自爲囊家所獲之利十倍於博徒又或窩藏土妓而分其夜合資青年子弟誤陷其中者不知凡幾官府吏胥畏其虎而冠也莫敢誰何廷鉞端士力矯其弊故農忙之時則荷鋤田間歲晚務閒亦或擁紡車以從事人問之曰劉先生近日作麼生廷鉞曰亦搯補緝頭子而已補緝頭子者鄉語也以彈熟之綿搓作筒形婦女執以紡紗者也於是一鄉傳爲美談其學射之師曰宋梗楠字謙光武生嫻弓刀從學者甚衆狀貌煦煦然似老嫗見者不知其武士也村中有大祆堂民教雜處光緒庚子辛丑間鬧教者日有所聞梗楠鄉望甚隆而又能調劑其間故其村民教

相安無絲毫蚤芥大順廣道龐鴻書給以扁額曰輯靜鄉閭併奏賞五品頂戴

王禧字明遠恩貢生也幼慧十齡熟讀十三經十三歲補博士弟子試輒優等然困於公車秋賦輒報罷掛帳里中邑南諸學子大都其門下士也氣貌莊嚴見之者無不肅然起敬鄉里遇有口角事他人不能調停者經禧一言立解故其村中至今猶有事不成託老明之語老明者禧之字也事繼母以孝聞听夕無倦歷數十年依然孺慕其訓異母弟也雖在童稚卽教以端方正直爲立身之基異母弟名錫爵亦諸生也幼遵母教及稍長又從兄受學故立品一如其兄云

方汝梅字吟鶴十五歲爲邑諸生以廩貢報捐知縣分發河南需次省垣未幾投牒歸蓋親見官僚盲聾腐敗禍國非有正法知識必不能有裨於國也於是治裝東游負笈江戶聽講於其法政學堂歸國以後思有所建樹然大局日紛擾不可收拾遂不復作出山之想焉乃於都門開設天足畫報館已又到處演說痛詆纏足之弊冀以強種者強國爲萬一之補救也終以民風錮閉非勸導所能奏功然而千百之中時有憬然覺悟悔纖纖新月形之無益因之自解其束縛者則此舉亦不無小補也

汝梅方面大口目可瞻焉行則作禹步狀氣昂昂然望而知非凡品少時狹遊長安道上選伎徵歌呼盧釣酒嘗與四姓小侯五陵年少角勝負已乃折節改行作翬翬肫篤士固今之周孝侯也性復嗜耶氏闢其門墻而吸其精髓以飽所欲其行徑飄忽詭譎令人不可思議卒年四十七歲

節十笏園
蕉文集

羅廷舉字行方性勤而儉富甲一鄉然不愛錢窶人子或有乞貸識與不識概周卹之里中一切善舉輒先注籍爲募者倡用不敷又出錢助之以藏其事以是爲鄉里所推重咸同間教匪煽亂某大員率師勦之廷舉出貲治戎裝以獻某大員喜曰不意鄉民小戶中乃有識大義如此者立賞給六品功牌俾爲報効者勸先是廷舉家貧飯粗糲衣短褐然善治生尤農力穡事嘗以笠閨首被草衣日作苦田隴間暇則執婦女業紡車軋軋其聲時與雞鳴犬吠相雜沓徹夜不休卒致大富少時田無一稜晚年乃積田百餘雙至今田舍翁談之猶嘖嘖稱羨不已云卒年八十有一

節十
笏園

蕉文
集

曹營基字子蘇邑中綴學士也體素羸弱冠爲諸生博極羣書有大志未嘗輕以示

人獨與邑人尙希賓友善相與討論古今治亂之由慨然有經世志嘗曰諸葛君略觀大意陶靖節不求甚解吾輩讀書當誌其犖犖大者又曰吾輩幸爲世用宜獨當一面不然亦使足跡徧九州安能鬱鬱株守作鄉里自了漢耶卒時年未三十尙希賓聞之大慟謂人曰子蘇肆意於兵農政治諸書余意其功名當旦夕致竟其所學何在不能爭烈古人卽或命舛數奇則攝一兩屐游宇內名山大川亦必能發舒其志氣爲文章以傳後孰知業未卒而賁志以歿且并其區區游歷而亦斬之耶劉孝

標有言魂魄一去將同秋草惜哉

節十笏園
焦文集

高步蟾字攀桂少孤貧而性超邁工制舉文綺歲卽補博士弟子員試輒冠其曹偶時稱爲人中爽爽何子朗其風概可想見也光緒甲午中式順天鄉試越歲赴禮部試時方與日本開戰燬北洋全軍覆沒遼東一帶半爲日本所陷朝廷震動命大學士李文忠公議和在京諸舉子爭紛紛言事步蟾亦署名其間旋見疏辭多迂緩欲自上書言方略後不果而歸歸則一家細弱無以自給乃走保陽館某富翁家復幕游斥漳廣阿間未幾卒于家年四十有四家貧不能葬其友邢金坡爲之經紀其喪

而安厝於城之東原

十笏園
蕉文集

李連騎字結駟氣貌嚴厲令人望而生畏咸豐辛酉拔貢生也是時英法聯軍逼京師清帝蒙塵粵捻諸匪蔓延十餘省畿南流寇東奔西突所至焚殺淫掠民不聊生連騎居北鄙七級乃仿新建村保之法築砦垣練鄉兵按戶出夫計畝輸資所謂疾犁羊黔烏陣雁行備突備梯狎城狎郭之術靡不宣究與其弟連棟村人尼名魁同心協力屢挫賊鋒北鄙數十村賴以保全者連騎之力也後盜平入質爲內閣中書供職樞垣旋以知縣銓分湖北鄂督李筱泉深相倚重委辦牙釐總局保加運同銜光緒八年著宜城縣古鄆陵地也民風刁悍盜賊充斥舊稱難治連騎下車伊始卽先禁娼賭次緝盜賊勵行數月宜境又安連騎嘗曰娼賭爲盜賊之媒盜媒不去未見盜賊之能治也又曰治民如醫疾善醫者治於未病既病矣卽當審致疾之由分其標本而理之未有不瘳者也聽訟卽時判決案無留牒宜人靡不德之惜未終年遽移疾歸明年二月卒於家

趙春林字森堂光緒乙酉拔貢目短視三尺外不能見人而談吐敏妙亦莊亦諧同

人無不樂就之以爲猶車公之在座也文章清明跳脫自爲諸生以至拔萃歲科兩試無一不列優等者詩亦饒有佳句應洺陽書院月課時一日詩題爲柳橋晴有絮春林有五字云雪不日邊消院長南皮崇餘堂大詩豪也持以示人曰此聰明絕頂語惜不研究風騷而專作試帖耳其爲巨眼人所推許如此辛卯秋試卒於小範旅次年僅四十有四春林歿後有陶翰英者孝廉瀛洲之孫也工制舉文試輒前茅蓋亦一夔之霸云

高維墀字壽仙以醫鳴一時見鄉里子弟因貧失學蕭然憂之遂出京錢六百緡於村之北郊建廣宅一區延師招生徒顏曰泰來義學又購地三十畝以每歲收入爲校中基本金於是濟濟學子皆具有普通知識四方之來游其地者聞絃誦琅琅聲莫不指而目之曰此高氏義塾也民國以還改爲國民學校焉

李迎春字寅東以諸生游宦京師爲國子監典籍丁艱歸里適值匪亂朝廷催辦民團以補兵力之不足董其事者名曰團長迎春既歸鄉人卽推充此職於是造軍械練勇丁儲子藥聯絡百餘村寇聞風遠颺一鄉因以獲安繼而改團爲保團長爲保

正迨畿南肅清朝廷又爲防民計統令撤消促繳銃械歸官而所謂團者保者遂解散無餘焉暨庚子國變朝廷又催令練團團因復活然在若有若無之間也民國成立政府令立保衛社猶昔之團也今又改社爲團矣迎春而外辦團者不一其選尤著者復有楊榮先趙德榮王紹典周鼎九諸人亦饒有成績

魏卿字華筵祖若運在曲阜衍聖公府供職頗著勤勞蒙賞武德騎尉額其門曰耆年碩德從父廷楷廩膳生有聲序序間卿席先人餘蔭家道殷盛亦任孔府守衛百戶咸豐同治間流寇猖獗被舉爲十八村民團團長保衛鄉邦籍得寧謐一日寇以大股至卿衆寡不敵爲寇擄去迫使降卿婉辭相拒面無懼色在寇中凡數日卒以計脫歸其機警有謀如此

張嶺梅字沛霖家赤貧年十五猶未就傅明經張審雅館於其鄉從學者甚衆嶺梅每自田中負薪歸輒釋擔門外竊聽審雅談經移時不去審雅見而異之遂令其入讀不數年童試冠軍聲雋一譽爲名諸生焉嘗以栽培心上地涵養性中天二語書之座右以自砥礪尤善書畫筆姿韶秀意態自如邑中扁書多出其手畫宗芥子園

晚年作潑墨山水滿紙淋漓見之者不知爲八十老翁所作也子中粹恩貢生亦善書爲時所重有寡姊貧而無子衣食於中粹家者終身卒年八十四歲中粹親視含殮與弟中華送諸家而葬之以是人稱其友于焉

張作楫字濟川家故素封至作楫而式微焉少嘗挑野菜於十里之外自謂饑極時白晝目中見星斗又謂古人云咬得菜根香可謂真知味者少長讀書勤憤爲邑中名諸生授徒里中從者甚衆每一講唱靡不悅服性和雅一夜有偷兒入其家竊取什物諸子侄揜而欲毆之作楫曰此人不過喫不住一貧字耳吾方憐之不暇忍毆之乎乃以京錢四百將所竊之紙刀贖回曰此治餽利器吾不忍舍也與陶瀛洲趙廷輝兩孝廉爲莫逆友每相訪必携卵韭爲下酒物談詩論文達旦不休瀛洲贈詩有云曾無斗粟醫君困惟有升堂愧我頻蓋紀實也

董福遐字宜堂廩膳生也居恒尙實踐不以文藝驕人然試輒高等肄業清暉書院爲十邑之冠兄弟七人家庭間怡怡無違言析爨以後長兄福昇子次兄福修子皆貧困不能自給福遐皆收養之課以農事均得飽暖嘗以藍田鄉約勸諭村人一鄉

子弟無游惰者鄉人頌其盛德焉子廷瀛宣統己酉拔貢亦雅有父風

張蓬萊字一峯勤於稼穡事繼母以孝聞一日偕馭僮買馬於市價已成矣而馬腹內有駒鬻者未之知也蓬萊謂之曰汝馬腹內有駒汝知之乎鬻者始悔然而其價已成不能反汗也蓬萊竟慨然還之又一日有騎馬經過其巷者遣一行囊囊內有交子錢七十餘緒蓬萊追而還之其行事類如此可謂古道炤人矣

高廓然邑諸生也與物無爭而好濟人之急其座右銘有云讓人一步最爲高濟人一點斯爲美時人以爲名言族人有兄弟析居骨肉參商大有尋戈之勢者廓然以腴田十畝慨贈其人而爭乃息平生抱雅尚對於菊花一物尤有特殊之感情著有菊花詩一卷燬於兵燹故無人知者

李大賓字正平父某爲鄉團團長歿後大賓繼之忠厚能忍遇事不喜更張人目爲迂儒光緒二十六年拳匪鬧教搆外釁及亂定而賠款事起賠欸者俗謂爲洋捐者也廣宗景廷賓抗不納捐聚衆倡亂擾及吾威戕天主教士羅澤浦大賓聞之大驚以爲國家方遣使議和保護教士無端戕之抗朝命矣吾鄉必罹其害未幾大兵雲

集景廷賓自件只村敗走凡邑北諸村聚均涉嫌疑於是紛紛避匿大賓以身爲團長義不容逃遂被逮長官訊大賓殺教士狀大賓謝不知蓋實情也而長官終疑大賓預謀復具酷刑拷之無左驗乃繫之於獄不數日竟卒

魏清心字欲寡沈勇而有謀略同治初流寇肆擾被舉爲鄉團團長一日寇大至輕騎數千甚囂塵上清心率團兵數百列陣郊野以待之寇見壁壘森嚴不敢遽犯已而稍卻陣中少年有欲挺身挑戰者清心止之曰賊人志在劫掠吾輩志在保全但能守我固有卽爲己得况賊勢方熾衆寡不敵奈何遽嬰其鋒貽害鄉人乎故寇雖屢至而鄉里皆無恙邑令聞而嘉之以爲知人知己深合戎機乃以干城偉望表其閭族人清源富而好施咸豐辛酉歲大祲邑多流亡清源賑其艱阨施而不德人多感之又有名德潤者談言微中片語解紛孝廉趙廷輝爲之表墓

徐光德字迪堂號逸仙父瀾觀察河東兼司鹺政光德隨宦山右者十餘年丁艱回籍爲邑中名諸生性爽直無執袴習平生好與寒士交而寒士亦多樂就之族人名立貞者一轍軻老明經也光德喜與游隻雞斗酒日追隨於寒燈敝榻之間談詩

論文娓娓忘倦見者不知其貴公子也厥後家計中落怡情花木與從父弟光楣同抱東籬之癖聞有佳種雖遠隔數十里必思所以致之每歲重陽籬落間花開如散金則必招其知好把酒畦畔賦詩搏戰以爲樂其高風逸致如此卒年四十二歲卒之明年乃選爲景州訓導而光德不及知矣

申閣梅字巨卿性愷悌所得於春氣者獨多對於家人對於社會有愛而無惡有喜而無怒所謂飲人以和令人自醉也有子五人皆令讀書吾國教子者多持嚴格家庭壓制時呈不祥閣梅獨以爲慈母者出之恩多於義以故諸子皆成立又皆克孝光緒庚子大旱自正月至六月不雨商業停滯飢民流離閣梅發所最粟散於里鄰全活無算又以力薄難普及乃躬詣縣署乞官發布告令富家開設質庫或出資購買土布吾威土產向以布爲大宗至是貧人之業織者皆得食以是不至爲大災從弟某諸生也浪蕩不檢富而中落貨其田宅殆盡閣梅憐之贈與腴田三十畝錢數百緡兩姊適人亦窘困每歸甯必有所資助無不滿載而歸其厚於骨肉如此景廷賓之變踞廣宗件只戕官仇教無理盲動不能以革命自解也而無識鄉民多欲

響應之關梅時爲保正爲之多方譬解曉以利害邑北數十村始乃不致蠻動始乃不罹兵禍及景廷賓失敗逃竄成安合肥段執政祺瑞時爲統領聞廷賓餘黨潛匿魚堤村砦中遂率兵攻而勦之圍已合矣關梅曰如此則魚堤一村糜爛矣乃與縣令張道源直入圍中面謁段統領力爲緩頰且以身作保謂砦中必無景黨段公始撤圍去亂定後直督袁公給以深明大義扁額袁公者即後日之大總統也

民國

孫九經字行一處荒僻之鄉當民智閉塞之秋而獨以興學爲惟一目的自組一私塾不惜多金聘名流爲塾中都講鄉里英年子弟許其自行束修隨意入塾讀書以是荷帙而來者踵相接光緒甲辰入泮生徒計有十八人之多一時號爲小登瀛清末鄉塾改爲國民學校九經已老矣猶捐重資置備校具內部之整頓多所贊畫蓋其興學之念始終不替也性好施與濟飢寒一日携二子自塾中歸時夜已深積雪盈尺寒風刺骨見一丐者臥地呻吟九經趨歸解所著舊綿袍命子往贈之已又念其無下裳履敝而襪穿也復命贈以襪履而後已謂其子曰此小善也前人云無以

小善而不爲汝曹宜誌之民國九年歲大無出積穀分贍鄉族得全活者甚衆其樂善好施多類此乃於是年九月夜間爲土匪掠去困匪巢中數日適值守者假寐欲殺之以洩憤梓其陰立斃頃之羣匪咸集遂遇害時年六十五歲

徐丕修字持真以農商致富而好行其德嘗爲民團團長購銃械勤捕緝積墊鉅資達千餘緡厥後貧苦之村或無力攤償丕修乃出券火之以是鄉人感戴表其門曰德洽鄉鄰光緒庚子歲大飢出錢二百緡分賑貧乏鄉人賴以全活者甚多民國六年汴人有趙思廉者偕其族人某自都門歸資斧乏絕某患喉痧呻吟道左時丕修見而憐之遂延至家中飲食醫藥供給二十餘日愈後併助之資使還里可謂強爲善者矣丕修前清太學生五品藍翎卒年七十八歲子步湘高等師範畢業今爲學界翹楚

王明魁字一元邑之西街人例貢生也性爽直與人無畦町事親最孝持家綦嚴遇鄉黨中婚喪大事無不竭力周旋弗憚勞瘁濟急恤貧在所不辭清光緒二十九年岳秀門外永濟橋傾圮車馬停頓行人心惻明魁目睹心傷慨然倡捐當炎夏盛暑

之時緩步徒行按戶勸募汗流浹背備嘗艱辛自覺不爲勞也宣統二年街中地保易某充兵三閱月國課警差無人催納明魁獨任其艱墊辦巨款旋即另舉地保以藏其事又每年立冬前三日陋俗閩搶草棉明魁親履田畝坐鎮以息紛爭民國二年卒年五十七歲

張殿英字藥軒增貢生世奉天主教而殿英獨能尊重教義與教外人無隔閡先是教徒與非教徒遇事多齟齬地方官裁斷不公允於是益相水火清季教案疊出職此之故庚子拳亂威縣亦預焉殿英性和藹爲邑名諸生嘗曰信教如徐光啓李之藻輩不惟倡明教宗並闡發歷算學術教友宜效之彼毀教及犯教規者坐不讀書耳楊進士錦江深韙其說庚子和議成教堂及全縣士紳委辦教案善後事殿英力主寬大不事苛求景逆之亂戕法教士於威境案關國際交涉殿英調護其間卒免地方於難民國十五年冬以疾卒年七十五一時教徒與非教徒咸悼惜之至他行實具載馬相伯所撰表墓文茲特揭其溝通民教感情有關地方政聞者俾後人讀邑乘有所省覽焉

袁尙忠字禹卿性淵美有幹局體弱如不勝衣中學畢業遂入法政大學沈酣法理而吸其精髓卒業歸里被選爲縣議會議長認定人民代表四字以不負一邑付託爲己任甲子之冬直奉構釁徵數省之兵雲集畿甸威境僻處冀南甲方索莖豆麥粉若干車送邢台用洋數千元乙方索莖豆麥粉若干車送大名用洋數千元忽而編民團爲陸軍忽而改游擊隊爲守備兵餉械悉籌自本境忽而徵民夫忽而設兵站忽而修汽車路起曲周穿威境直達南宮雖事多中止未臻完全成立而吾威之損失已不貲矣所最危險者陝軍張治公之過境也以全師潰兵蜂擁而至佔城廂皆滿叩門叫囂自昏達旦尙忠聯合各界士紳奔走招待虛與委蛇幸不至全城糜爛乃喘息甫定鎮使又派員坐催軍餉一萬元磋商累日終提六千元以去尙忠嘆曰吾爲十六萬人代表民貧財盡一至於此吾不能絲毫有所挽救安用此代表爲自是心灰意墮託爲經理棉業薄游歷下徧觀七十二泉以抒其佗僚抑鬱之氣然而懷抱既惡沴氣易乘而入初染寒疾不至殞命既乃誤服峻劑遂以不起年裁二十有九邑之人無不悼而惜之

藝術

易林有書撼龍有經皆陰陽小數也其術驗者十之一二不驗者十之八九深信之人談其驗者而諱其不驗者好奇之人傳其驗者而置其不驗者兼之禍福中於人心雖明知其不驗而猶冀其或驗此其書所以流傳至今也明哲之士無不薄之而卒不能廢之於是習其術者往往有聲於世焉至於名醫之用藥驅使草木指揮參苓實能起沈疴而療痼疾古之俞跗盧扁後之長沙河間夫豈浪得名哉別有書法二王畫宗三祖以一枝妙筆可使羲獻復生荆關再見此美術之一種也高人韻士多出其中固非尋常藝術可比矣

北齊

宋景業廣宗人也明周易爲陰陽緯候之學兼明歷數魏末任北平太守顯祖作相在晉陽景業因高德政上言易稽覽圖曰鼎五月聖人君天與延年齒東北水中庶人王高得之謹案東北水謂渤海也高得之明高氏得天下也時魏武定八年五月也高德政徐之才竝勸文宣應天受禪乃之鄴至平城都諸大臣沮計將還賀拔仁

等又云宋景業誤王宜斬之以謝天下帝曰宋景業當爲帝王師何可殺也還至并顯祖令景業筮遇乾之鼎景業曰乾爲君天也易曰時乘六龍以御天鼎五月卦也宜以仲夏吉辰御天受禪或曰陰陽書五月不可入官犯之卒於其位景業曰此乃大吉王爲天子無復下期豈得不終於其位帝大悅天保初封長城縣子受詔撰天保歷李廣爲之序

齊書參北史

清

徐光沂精醫術每一臨症必沈思詳審所見稍有未確卽不輕易立方嘗曰吾輩讀聖賢書不能置身通顯利濟生民已覺抱憾更何忍玩視人命以自試其技乎以故凡所醫治無不立愈族人有名文業者善傷寒名如松者善瘟疫俱有聲又有名雋甲者武生精拳勇然性溫和竝通卜筮堪輿諸術亦頗名噪一時云

蘇修五字有典號松樵其父論崇字宏美官江西吉水縣巡檢頗有政聲循吏有傳修五隨宦江西善畫蘭蕙撫鄭所南幾亂真名播贛江東西子景泉亦官江西巡檢亦能畫蘭雅有父風

徐三略字有房乾隆五十一年武舉官湖北沔陽縣守備德威並用賞罰無私軍民帖服陞四川叙馬營都司教匪之亂蔓延川中三略身先士卒相機勦撫地方賴以安堵未幾因疾告歸善丹青尤精畫竹有綠筠軒竹譜行世

府志

李成鳳字來儀邃於醫術尤長於傷寒瘟疫等症村人某項生一瘍羣醫束手成鳳至咲曰易耳但搗藥搓患處數日而痂復數日而痂落論者謂太倉公解顛理腦其術不是過也光緒壬寅虎疫大作延之者踵相接時成鳳齒已叢矣猶切脈稱藥無間晝夜積勞成疾卒年八十有三同時有楊茂字如松者亦精醫術延之者無貧富遠近莫不卽往有歎以酒食者卽立歸不累病人家也賣藥不較值予者受之不予者不登門索逋也又有夏文鰲者精外科不設藥肆當農忙時往往有事田畝求醫者到門不遇則尋之於田隴間繹絡不絕文鰲無厭志無倦容一一爲之施治晚年榮問休暢鄉人爲之扁表其門曰德隆望重卒年八十有六又有李銘者善治瘟疫光緒壬寅大疫死者相望銘活人無算鄉人德之房英武字繼文附貢生也以文名雄一邑同治初流寇紛擾邑北數十村舉爲保正

猶古之百保也英武自出家資千餘緡訓練民兵擊刺有法流寇懾服相戒不敢犯數十村賴以保全尤善治疽著手立愈人比之華元化他人有得其成方者皆可藉以名一時藥餌不索值鄉人靡不德之同時有張萬禮者善接骨骨雖碎亦能接之愈後不索一錢與英武同

趙豐年字慶齋以諸生習醫術婦人科所詣尤精四方求診者盈室寒巷豐年以來時之後先爲序一一爲之診脈處方無不歡然以去有延之者亦處方卽歸從不飲人一杯酒說文謂醫字從酉酉者酒也言醫者必飲人酒也豐年獨不然則醫字直可去酉作毆矣晚年精神矍鑠八十有三始卒又有劉維祺者字象鼎亦諸生習醫亦精婦女科其爲社會歡迎亦如豐年延之者無間晝夜往往有風雨殘更火急打門而來者或車馬或徒步無不披衣隨之而去其盛德如此卒年亦八十有三陶東山字明訓諸生也性惡時文常言時文乃求名之器經史乃鑄人之器人當熟讀經史以鑄自己若畢生專務求名之器在苒光陰豈非黃金擲虛牝乎工楷法兼善行草詩亦天籟自鳴有東籬家風所著曰善則堂詩草毀於兵燹有人傳其遺句

云吟詩不作雷同語縱有微瑕品亦高其詩可想見也

和茗芳字然亭壬寅副貢也善榜書如高巖古樹槎枒橫秋殆安吳包所謂逸品者歟平生好以力雄人握人手痛不可忍無能脫以去者肄業蓮花池時高陽韓緘古德銘身軀偉岸亦好以力雄人自稱韓大將軍獨不敢與茗芳角抵嘗曰吾最怕老然鬼手馨強來捉人臂蓋其腕力非常故作字亦勁絕云著有玉燭軒稿藏於家同里有王樹德高風儀者皆以諸生善書一肥潤似顏清臣一瘦硬似歐陽率更皆年甫四十而卒與茗芳同一短折焉

段鷗字邠春天懷挺率意度颯然少年好任俠所交多椒儻非常不修儀檢之士有贈某羽流詩云幾卷破書三尺劍無多行李一肩挑其友道之廣可見也好作墨蘭每酒闌燭爓隨意命筆花含古春葉不搖風大有勁草誠臣之意昔鄭所南寫蘭根不著土蓋自喻亡國遺民四海無插腳地也鷗之寫蘭亦自寫其小照而已中年以後作尉河南需次省垣日與二三朋好作亡何飲壬寅癸卯威人之應秋試者借闈汴省鷗悉招而觴之席間劇談大笑氣吐秋虹一官落拓絕不介懷久之以母夫人

年高力難迎養遂掛冠歸

節楚碧
堂文集

常培泰字時亨初業醫瓣香修園不敢有所出入繼乃神而明之抉其離潰其藩而自爲一家焉用藥不過五六物罔不奏效昔唐甄權有云古之上醫要在視脈病乃可識病與藥值唯用一物攻之氣純而愈速今之人不善爲脉以情度病多其物以幸有功譬獵不知免廣絡原野冀一獲之術亦疏矣若培泰者其近於上醫乎惟生平聲價太高延之者非巾車不出餽饌不豐美亦不出以是人多怨之然其術固自精也邑令胡千里嘗延之酬以巨金辭不受而祈除地丁捐梢之弊邑人又多稱之劉增華字榮春諸生工繪事尤精於虎每畫一虎彪彪有生氣滿紙如聞風聲塵雪崖畫虎行云自有此虎掛此堂夜夜壁上生光芒偃鬼暗伺空庭黑白狐走泣黃狐僵可以移贈蓋包鼎之流亞也家故清貧一介不取有古狷士風光緒四年打包南游遍歷虎邱太湖錢塘孤山之勝久而不歸莫知所終或言在浙西某寺下髮爲僧云

王著勳字銘齋邑諸生家非素封而性好施與戚族有所乞貸無空手歸者有姊少

寡甥女吳幼失怙恃皆衣食於著勳家者數十年表妹馬氏家貧無依于歸時一切妝奩亦慨然任之生平善書法學顏平原得其神髓不在形迹間也又和易無名士氣求書者踵相接有寒士某藉其墨寶以謀生人爭購之家用小康焉

節楊錦江所撰墓表

張同德字共善誦讀餘暇喜抄方書思以醫術鳴於世繼念醫學廣大非一人聽力所能遍習於是專治咽喉凡喉科指掌白喉忌表走馬喉疔諸書無不潛心研究因乎古而不泥乎古常得古人法外意故凡所診治靡不立效時有李煥堂者病喉氣垂絕延同德診之先以散藥刈其苗後以湯藥剷其根一二日即愈又有李傑之母咽閉數日湯水不能入母子相向哭或以同德語傑傑與其母往就醫焉同德以丹藥吹入喉間不時許食下咽矣母子感極而泣又有翟福增者喉管擁腫呼吸不能通同德治之立愈諸如此類殆難枚舉鄉人表其門曰功參良相著有喉科秘訣藏於家時又有劉立志者亦精喉科頗奏奇效焉

王雲龍字時見歲貢生景廷賓之變官軍雲集鄉民無識者疑爲洋兵多欲拒之雲龍時爲保正多方勸諭始免暴動旣而他保之助景者爲官軍擊潰死傷枕籍哭聲

遍野雲龍所居之鄉安堵如故至是而向之集矢者皆服其有先見焉爲人和藹精醫術邑令胡良駒表以著手回春子鎔錡能傳其術皆稱良醫焉同時有史明哲王蓋臣者一善治膨脹一善治瘟疫皆有名於時

張永弼字良佐歲貢生少嫻丹青山水尤佳其族人慎字訥如工寫生所畫百蝶圖人稱精妙不減滕王之江夏班村裏來也

劉星煒字耀燭父病延醫其醫善作態自高聲價不時至因發憤自攻醫且矢曰吾他日術成必力矯此惡習於是聚書數十百種凡夫靈飛素問金匱玉函靡不宣究而尤精於針術海內稱針法者向推歸安凌氏謂明凌雲也星煒針法其奏效之速實不多讓凡有延之者人無論貧富時不問晝夜無不登時隨往以故人皆德之光緒壬寅虎疫盛行死者相望於街陌凡經星煒所診治或以一針相加遺靡不回春者日躩蹠於病者之家刻無寧晷始則不暇飲食繼則不能飲食積五六日僅食饌鱗二枚以七十九歲之老翁勞悴至此將何以堪未幾病卒子澤璽字潤璧邑諸生也傳其家學亦以善醫稱

列女

漢劉向有列女傳明解縉有古今列女傳列女傳者猶女列傳也女子之德不止一端吾國數千年來帝王制禮聖賢垂訓女子無不以夫爲天夫旣以夫爲天則必不二所天不二所天則必從一而終從一而終於是而貞者出焉於是而烈者出焉且旣以夫爲天則夫之父母亦卽己之父母夫之意向亦卽己之意向於是而孝與順又出焉貞也烈也孝也順也此吾國之國粹也自西化東漸與吾國家庭恰立於反對之地何則西人家庭男女平等且女權日就膨脹大有女尊男卑之趨勢女尊矣男卑矣孝順二字尙成問題乎不但己也結婚自由離婚自由今日夫妻明日卽可路人兼以公妻之說日震耳鼓貞烈二字更無所用乎中國如此西人如彼各是其是無不言之成理如激戰然不知最後五分鐘屬之西歟屬之亞歟烏呼道德玄黃自古至今尙無一定之標準不知百千年後億萬年後終有解決之一日否吾威亞洲地也吾志列女吾守吾國之國粹而已上起后妃下至窮檐之嫠凡屬具有婦德克守女箴與夫封鮓丸熊人稱賢母吟詩作畫羣號才媛者靡不爲之立傳列表以

輝形管焉

三國魏

文德郭皇后安平廣宗人也后少而父永奇之曰此乃吾女中王也遂以女王爲字

魏書曰父永官至南郡太守諡敬母姓董氏生三男二女長男浮高唐令次女昱次卽后后弟都弟成后以漢中平元年三月乙卯生 早失二親喪亂

流離太祖爲魏公時得入東宮后有智數時時有所獻納文帝定爲嗣后有謀焉太

子卽王位后爲夫人及踐祚爲貴嬪黃初三年立爲皇后魏書曰后上表謝曰妾無

思齊之倫誠不足以假充女君之盛位處中饋之重任后自在東宮及卽尊位雖有異寵心愈恭肅共養永壽宮以孝聞是時柴貴人亦有寵后教訓獎導之後宮諸貴

人時有過失常彌覆之有譴讓輒爲帝言其本末帝或大有所怒至爲之頓首請罪是以六宮無怨性儉約不好音樂常慕漢明德馬后之爲人 后早喪兄

弟以從兄表繼永後拜奉車都尉后外親劉斐與他國爲婚婚後聞之勅曰諸親戚嫁

娶自當與鄉里門戶匹敵者不得因勢強與他方人婚也后姊子孟武還鄉里求小

妻后止之遂勅諸家曰今世婦女少當配將士不得因緣以爲妾也宜各自慎無爲

罰首五年帝東征后留許昌永始臺時霖雨百餘日城樓多壞有司奏請移止后曰

昔楚昭日出游貞姜留漸臺江水至使者迎而無符不去卒沒今帝在遠吾幸未有

是患而便移止奈何羣臣莫敢復言明帝即位尊爲皇太后進表爵鄉侯以表子詳訓皆爲騎都尉孟武母卒欲厚葬起祠堂太后止之曰自喪亂以來墳墓無不發掘皆由厚葬也首陽陵可以爲法青龍三年后崩於許昌葬首陽陵西

魏志后妃傳

明

世宗劉妃威縣劉樸女嘉靖選入宮後冊爲妃

廣平府志

按明史世宗有五妃曰方妃曰張妃曰沈妃曰閻妃曰曹妃獨無劉妃其人其諸

明史之失載歟抑府志之有誤歟

李還妻蕭氏年十八夫亡遺腹生子慮有奪其志者停柩於室朝夕抱孤哭奠曰所不死以從未亡人者爲此一塊肉耳凡十三年孤長乃出葬家極貧一切喪費皆其勤苦之所積也嘉靖五年旌

畿輔通志
參舊志

戚敬妻王氏年十九而寡遺腹生子誓死守節以紡績奉養舅姑年八十餘卒

齊志

王曦妻白氏南宮縣尙書圭之孫女也年二十六曦客於直沽遇盜溺水死子化甫六歲女才百日氏攜孤收屍還葬苦節三十餘年

畿輔通志
參舊志

貢生賈瑄繼妻李氏撫前室三子如己出年二十二瑄卒有遺腹子撫之俱成立守

節四十餘年卒

舊志

孫珣妻薛氏珣卒時氏年二十一卽絕飲食哀哭理喪事既殯欲死以殉家人指其懷抱之子延曰汝死此兒失恃不免俱殞一死與存祀孰爲大乃復飲食恃糶車以爲生活竟撫孤嬰成立四十五年而卒

全上

王子卿妻劉氏子卿死氏年二十子方三歲尋殤人欲給其改嫁百計不能動以死自誓享年八十餘而卒

全上

義官王卿妻劉氏適卿數歲不能育夫憂之乃告夫曰吾妹純厚必能生子乃娶妹以副以德禮率之妹克執婦道且焚香祝曰願天佑吾姊妹二人中生一子以延王氏嗣旣而妹果生子卽監生宗旦也歡甚謝天曰吾願足矣子甫六月夫亡時氏年二十九妹年二十二氏欲死以從忽渙然哭告夫屍曰汝死從死義也吾妹年幼或不能撫孤以傷汝心吾姑待之遂與妹協力撫孤守節三十餘年而亡妹亦清節無

玷

舊志

王欽妻馬氏適欽甫一歲生子臣夫亡氏年十七歲遂欲自盡以從其姑泣解曰汝若自盡婦道得矣老身零丁一旦不諱誰收骸骨者况王家一塊肉尙存撫之以全宗祀不亦可乎氏悟乃鬻衣以葬竭力奉姑享年八十餘而卒

志

生員李文鳳妻王氏事姑以孝聞文鳳有聲庠序病故時氏年二十五歲父母慮其年幼諭以從權改適氏堅不從曰夫既死我何忍獨生所以不即死者以姑老子幼故耳今以改節望我我其從夫去矣自是遂勺水不進父母悔謝因復進食日惟兩盂僅延殘喘三年之內無一怡容終喪以後不御鉛華紡績度日課子讀書柏舟之節歷五十年不渝知縣趙沛申請於朝萬歷三十三年建坊於門額曰貞節

全上

玉希皋妻黑氏

廣平府志謂郝氏作黑者誤不知黑氏臨清望族是以不誤爲誤也

臨清人希皋卒時氏年二十四父

母憐其家貧欲奪其志氏泣曰若是則七旬翁姑七齡孤子將置何地也遂欲自盡以殉其家再三勸諭乃止孝養翁姑年皆八十餘而終撫孤維甯中嘉靖戊午舉人爲河南溫縣令迎氏入署祿養二年氏多病思家維寧遂謝政歸里日惟杜門家居二十餘年未嘗以纖毫之私干邑宰皆氏之戒也享年九十歲

全上

陳得禮妻趙氏年二十而夫亡無子無產人勸之嫁氏以死自誓採薪供爨以養其孀姑苦節五十年萬歷間本縣奏聞建坊旌表

上全

生員趙來儒妻董氏子千里媳胡氏董年二十九來儒卒遺孤千里僅四齡撫之成立補邑諸生娶媳胡氏歲餘千里亦死無所出姑婦相依爲命苦節共守董至八十餘卒胡至六十餘卒邑令具申撫按給扁表之

上全

龐之屏妻尹氏郡承言之妹也夫亡氏年二十有三遺孤二尙在襁褓氏一意貞守

教子成名卒受旌表

歲輔
通志

張學孔妻王氏幼聰慧知書夫病且革子守甫周歲氏年十七耳夫恐其年少不能自持微詰之以觀其志氏泣以死自誓撤瑱毀容不出戶闔訓子讀書爲名諸生享年七十餘而終

舊志

孫荷妻賈氏尙書待問女也年二十九荷亡止生二女或有以他適諷者氏叱之曰若何敢以此言污吾耳玷吾家聲也自是人莫敢言荷兄藉夫婦亦早逝遺一孤纔數歲氏即撫育不啻己出二女俱適名門而所撫孤亦成立有室奉氏一如其母邑

宰具申兩院旌表

舊志

沙宗巖妻郭氏早寡三子皆幼撫孤四十餘年壽七十歲卒仲子蘊金領鄉薦官湯

陰令氏贈孀人

舊志

孫蒼妻王氏家適被盜拷掠蒼及其母甚慘氏厲聲曰我家實無積財願同死遂自樓上投入火中賊相顧感動散去崇禎十二年奉旨旌表

畿輔通志

賈紹庭妻孫氏平恩大中丞維城女也崇禎戊寅清兵薄城下氏與紹庭訣曰事迫矣萬有不虞妾惟矢一死以報君耳城陷氏令婢報其夫曰吾其從銀瓶游乎遂投井而死以閨中弱質而從容就義如此

全上

張國翰妻李氏戊寅之變被執不屈厲聲曰吾名家女肯爲若輩所污耶虜逼百端終不屈遂冒刃而死邑令李公爲之請旌

舊志

趙媚母樊氏戊寅之變城陷赴水死媚亦稜稜有氣節以國子俊士候選知縣有某璫爲之謀曰倘資緣于三王替僧鄰邑邱縣令可得也錦衣晝行榮何如乎媚夷然不屑某璫銜之坐是終身不得入仕版卒年七十有三繼室王氏年三十爲之守節

終身

上全

王欽恩繼母司氏妻高氏俱早寡同志苦節始終不渝高事繼姑更以孝著縣令張

楷表其門

廣平府志

張鳳儀妻夏氏嫁未踰年而寡矢志守貞值山東土寇爲亂掠氏去夏大呼曰我乃節婦只拌一死號哭不食自破其頭面賊憐其節竟縱之歸後以善終

上全

清

王鳳苞妻劉氏年二十五而夫亡遺孤四俱幼家徒四壁不舉火者數日自分必死矣其長子偶發土掘得金環八雙一家得生人謂天憐其苦節

畿輔通志

張昆妻賈氏偶行田中遇凶徒林中傑逼奸不從用鎌刀刺腹死康熙四十八年旌

上全

郭崇城妻沙氏子文燦媳李氏沙年二十夫亡撫孤文燦成立娶媳李氏年十九文燦復亡姑婦相依守節沙年六十八李年九十二卒已旌

上全

朱正色妻呂氏年二十夫亡守節四十餘年縣令劉德亮表其門曰節茂松筠

上全

王連妻董氏雲南人翁任雲南鹽大使于歸後翁改任粵西與夫隨往未幾翁與夫並歿於官遺橐蕭然董年三十携二幼子竭力經營扶櫬歸葬貧無以食堅貞不渝縣令盧豪然表其門曰萬里堅貞上全

劉廷貴妻范氏年十七夫亡無子其祖姑憐之示意使他適范誓死不從以姪大忠爲嗣守節四十餘年學政錢陳羣表其門曰全貞啓後上全

趙之牧妻賀氏年十七于歸生一子夫亡父母欲奪其志賀堅守不渝撫子娶媳周氏甫五載子又亡周承姑志亦以苦節自矢賀年七十有八周年七十餘卒上全

趙謙妻王氏謙夏月外出王獨寢室中風動簾啓若有人過之者氏疑爲人所窺忿不欲生翁姑與夫曲喻之終勿能解曰與其將疑而生不如將信而死竟縊死事聞制府表其門上全

張福統妻楊氏年二十五夫亡遺孤永年尙幼家赤貧事親教子孝慈兼盡永年早亡又撫幼孫守節至七十四歲卒上全

剛成仁妻尼氏年十八夫亡無子矢志守節家貧奉翁姑暨伯翁姑養葬無不盡禮

卒年五十有八

上全

李良選妻王氏年二十三夫亡無子矢志不二事翁姑歷十餘年不懈姑張氏歿事繼姑耿氏楊氏如一以夫堂姪欽棠爲嗣撫之成立年七十九卒咸豐九年縣令吳師郊以冰雪爲心表其門

上全

馬福海妻周氏二十一歲時福海亡遺有一子甫周歲翁姑皆頽暮田僅六畝無人耕耘氏携其孤兒以手代鋤兒呱呱泣隴頭不顧也時挑野菜以供晨炊身無完裙見者靡不憐之同治初年流寇擾畿南人多避居城中翁姑老病不能行促氏隨鄰媪入城氏曰寇來不過掠物耳吾家一貧如洗何惧爲且媳去翁姑誰服侍者堅不去已而母弟復來促之仍不去謂其弟曰汝可携吾兒去爲馬家留此一塊肉吾終不忍舍吾翁姑也無何寇至問氏曰汝村巷無居人汝家何獨留乎氏告之故寇大感動相與呼嘯而去氏卒時年五十九歲

郭靈杰繼妻李氏年二十三夫亡號泣不食誓以死殉姑日夜防之竝遣一媪爲伴李伺媪眠熟潛起自縊死

王辛酉妻馬氏幼失怙母再醮於張某氏從之往甫數歲其繼父又以瘵死家赤貧
母女相依爲命氏日樵於野既長歸辛酉辛酉亦貧子所居屋僅一間許壁漆黑冬
日編草爲幃然尙有瘠田數畝辛酉力耕亦時或爲人傭作氏乃緝槿花之實織以
爲婦女纏帶如是者六七年家亦因之小康焉無何辛酉死氏瘡焉而嫠都無子女
於是乃以其母來辛酉有弟名心廣久已析爨素無行於鄉里然善拳勇故無敢誰
何者至是見其兄之有遺產也遂謀逼嫁其嫂而取爲己有乃自爲媒之於里人某
甲氏聞之大哭心廣乃摔氏之髮痛箝於庭氏顏面皆破血涔涔滴其母一老嫗也
哭而抱其女心廣併痛箝之母惴失魂遺溺褊褊間氏匍匐訴之母家母家以其非
張氏所自出置不問而馬氏亦無近族無可訴者於是乃與其母匍匐訴之邑而心
廣卽於其訴邑之日拆毀其屋併取其甲中之麥而轉售之於人邑宰又曠曠者月
餘始傳心廣到庭歲餘訟始結僅呵叱之而已初未追還其產也氏於是一貧如洗
靡所棲立乃賃屋以居其母亦憂鬱驚悸而死矣有富人劉某者新喪偶聞氏賢欲
娶之屬媒媪爲之作合氏仰天歎曰吾所以顛頓至此者以不肯負吾夫也生爲王

氏婦死爲王氏鬼歿葬王氏墓田而已使見金夫而不有躬其如泉下人何哉媒媪
悵悵去後竟窮餓以死族人醜金葬之卒與辛酉合祔焉

楚碧
堂集

郭雲章妻郭氏雲章故中人產有無賴子某與其家有隙一日者持短刀怒詈於門
雲章不敢出俄而以刀自砍其額角血漉漉沒口鼻仆地竟死其家訟之官官逮雲
章與其父兄俱至縣併予大杖雲章與其兄受創重不數日俱斃未幾其父亦斃家
資亦蕩然焉氏於是年始二十許其姒又前卒遺有二子曰文學曰博學皆數歲氏
悉撫之如己出借鍼黹以養其孀姑拮据零丁莫可言狀無何其母家招之歸甯氏
遂携文學博學徒而往至則其父謂之曰吾所以招汝至此者爲汝終身計也夫纓
髦勵貞終身而不二所天誰曰不善然必家有遺產室有子女始可以賦柏舟而矢
靡他不然者塊焉獨處雖日啖糠覈不可得而猶曰志也節也豈非癡人乎吾已爲
爾相攸爾其無拂吾意氏聞言泣不可仰徐謂其父曰謂吾無子女乎而文學博學
謂吾母者吾謂之子也使吾而黃鵠別飛如此兩孺子何吾姑又讐且讐吾去更如
此老人何吾父謂吾貧乎而貧愈不可去也貧愈不敢去也父也天只何其不相諒

歎於是復携文學博學疾走至家數年不敢歸寧食貧終身至七十八歲始卒

楚碧堂集

劉蘊富妻李氏十九歲于歸夫有弟二女弟二皆繼母出也繼母嚴峻而善病氏三日入厨即委以家事蓋分屬冢婦責有難追也上承威姑之顏色下應宛若之要求料理家政井井有條後以食指日繁分爨各居蘊富好施與債臺紫紫產業凋零尋以懊喪死是時氏年二十七家無半升之粟門無五尺之僮癯癯依形影相弔越三月生一遺腹子曰澤澍而氏心於以稍慰焉然澤澍幼而多病五六歲時尙未免懷氏加意撫育稍長即令入塾讀書學錢拮据時灑暗淚厥後澤澍補諸生蜚聲藝林且親見七齡幼孫燈下琅琅然讀論語如流水然則氏之晚景回甘皆其早年茹荼懷藥之報也光緒三十年經有司疏奏清帝硃批准其建坊入祠榮莫大焉卒年七十五歲

尹秀雲妻劉氏十七歲于歸甫十二日而流寇宋景詩率兵數千掠其村秀雲遇害死氏事其孀姑足不履戶者十五年三十二歲以完節終

張永昇繼妻欒氏于歸永昇三年而夫亡氏才二十二歲耳前室遺有二子均在幼

稚家中薄田二十畝耕種無人外債二百餘緡無能償還氏以紡織度日每織時以細繩繫兩小兒於機側兒或泣則振繩之一端以誘之歡笑不暇輟織也及兩小兒稍長氏往田間省稼則携之與俱告之某也菽某也麥併示以稼穡艱難其後二子皆成立氏卒時年七十二

張恒菊妻劉氏結褵三年夫亡一子東紳才周晬耳易簣之夕一痛幾絕惟念姑本孀居今又喪子人世沈痛當無逾於此者况呱呱者在抱將誰依乎於是移哀作孝晨夕詣堂上博老人歡一家喫著悉取給於氏之十指時年方二十歲也迨姑歿後與夫弟恒蘭共居者四十餘年弟婦宋氏終年患病不離藥餌氏視其子如己子視其女如己女飲食衣履皆一身任之鄉里無不稱羨焉卒年六十九歲

翁題元妻王氏年未及笄卽于歸未期年而夫亡氏守節五十年邑宰爲之請旌建坊併入節孝祠

文生徐光岱妻王氏二十八歲夫亡氏矢志守節上事翁姑下撫幼子克盡孝慈茹苦含辛者三十五年子塘早亡塘妻李氏亦能守節教子大著賢聲克肖其姑云王

氏已旌

和女史孝廉淦之女也淦六女女史尤聰慧幼耽詩書鍼黹偶暇卽手一卷不忍釋淦本詩人時辟呬詔之女史無不卽時領解嘗作詩故限險韻以數目排比之詩成無斧鑿痕雖方聞綴學之士有不能及者長適東昌某顯宦家兩姓子姪女娣皆女史教之簪具之旁翰墨縱橫閨閣中幾成學舍時人咸稱之曰女先生著有猗翠軒稿藏於家詩有中晚風味

十笏園
蕉文集

陶女史家素封父洵以武生官千總女史性廉潔雖生長宦族而不好榮華女紅之餘酷嗜吟咏尤愛其宗靖節詩工書善畫風神淡遠亦逸品也母早亡事後母以孝聞堂上滫瀡必親手罔或不蠲一切中饋事悉委女史米鹽凌襍女史無倦容亦無矜色後母極愛憐之適廣宗縣拔貢生鄭某鄭亦狷士清聲噪於鄉里女史成夫之志始終不少懈以故室中數十年無詬誶聲曹大家所謂婦如影響焉得不賞者女史有焉其夫從子元善以進士官河南巡撫影纓赫然爲當時望族屢遺白金爲女史甘旨費女史悉封還或尤之氏曰遺吾者所以養吾也吾無所用其養固當還之

乃以此爲子孫產業計乎其廉潔大率類是詩稿久散佚所畫花卉舊族大家多有之往往視爲異寶云

十笏園
蕪文集

魏振聲繼室王氏二十七歲夫亡遺一子名儒方週歲先是振聲有子名名高早夭其媳蕭氏年始二十八歲無所出於是姑媳相依爲命零丁可憐共撫名儒成立早歲游庠娶妻侯氏亦賢淑連舉二子兩孀婦喜可知也未幾名儒又夭折侯氏年纔三十懷清之臺先後同登與姑嫂共勵冰霜持家教子嚴慈竝用一時稱爲魏氏三節婦王氏壽六十二歲蕭氏壽六十九歲侯氏五十五歲

趙三光妻陸氏十七歲夫亡子女無所出誓死而不二所天事翁如父事繼姑如母翁姑亦愛之如女不數年翁歿又數年姑亦歿遺有三子長三顧次三宅又次三榜顧宅稍長榜則藐焉始孩不知六七既無嚴父之督責又無慈母之教育氏料理家事措置裕如督顧宅勤耕作遺榜出就外傳隨羣兒讀書已則晝夜紡紗託孥車以爲命三小郎或耕或讀歸必述之於嫂嫂或有所責數則三小郎悚惕不敢有言蓋事嫂如事母焉如是者十餘年置良田二百畝三榜亦入庠爲諸生易名仙竺鄉里

同聲稱羨請之邑宰給以節孝垂型形管揚輝扁額壽享八十五歲

尙登科繼室趙氏夫亡時遺一子一女田不十畝盜無儲粟日操致車爲業猶艱一飽母家憐之勸令改適氏泣曰我雖未識詩書猶明大義女貴從一安可有他豈以我貧懼累君家耶果爾請從此絕以故不至母家者二十餘年雖慶弔亦不與聞風雨寒閨日與一子一女閉戶操作而已卒年八十五歲

武清偉妻翟氏年少而寡翁亦頽然老乃復娶一再醮婦氏曲盡孝養得其歡心夫有既嫁之女弟一貧家婦也歲暮窘甚遣其幼子某來外家有所乞貸翁姑吝不肯與幼子某含淚去氏送至門外潛出己之私積與之此尤人情所難能也

項增裕妻王氏二十歲夫亡姑亦相繼歿遺有一子一女俱幼皆氏撫養之女又雙目瞽凡梳頭洗足之事惟氏是賴氏始終無倦意鄉里無不稱之

諸生王炳森妻史氏二十一歲夫亡姑已前卒翁年六十餘患痿痺病三年不起延醫服藥至八百餘劑皆氏一手煎熬飲食便溺亦氏一人侍奉其後病竟愈壽至八十七歲而終節婦孝婦蓋一身兼之焉

潘占元妻尹氏未扶牀時父母即爲結婚十四歲即于歸占元痴而顛飢不知食寒不知衣便溺於禪中亦不知也氏以時食之以時衣之便溺爲洗滌之無厭色亦無厭意習俗元旦例於中夜起煮食水點心氏煮竟欲呼其夫共食而夫方在被池嘗惡穢不可近啞啞咲不止氏亦咲曰痴郎子乃痴至此哉里中莫不爲氏惜謂如此佳婦偶此痴兒真不會作天莫作天也然氏則婉孌自若絕不容心亦絕無歸怨父母意未二年占元病死氏哀哭如禮從此寂寞空閨長齋奉佛日持經卷念珠喃喃不已如此邱尼自言吾命如荼苦借大雄氏以修來生也其堅貞如此

李鳴鶴妻石氏鳴鶴嗜酒其兄督責之嚴乃棄家西入秦中兩年無音耗嗣有自陝來者云鳴鶴到陝後仍嗜酒醉臥爐火之旁被焚身死渴葬長安城外義塚中氏聞之慟不欲生謀歸夫柩而無力是時氏年二十二歲一女甫四齡一子未週歲而殤又值家中分爨母女熒熒無依或有勸其改適者氏矢死靡他茹苦自甘時或斷炊則爲人縫紉以自給無咲聲無怨言温和厚重歷三十年如一日鄉里戚黨無不稱之卒年五十餘歲

李清儒妻郭氏三十夫亡未幾舅姑相繼歿光緒庚子歲大無常數日不舉火日拾林間風墮之小棗充饑絕不乞貸於人母弟勸之改適氏輒申申嘗之一日弟不與謀竊媒之於夫己氏諷吉迎娶己有日矣氏聞之投井者再皆遇救而出自是無敢爲之作蹇修者守志二十一年而卒

徐承緒妻張氏家酷貧夫馱愚不解耕作不能爲人傭受僱直舅一七十老鰥夫背曲如駝日夜咳不止氏襤褸托鉢乞食村巷中擇其稍精者奉舅其粗惡不堪食者己與夫共食之村人以其孝也亦無不樂與之者以故頻年荒歉氏與舅夫餓而不孳卒免爲溝中瘠信乎孝之感人深也

張沂妻張氏舅作楫邑中碩儒家庭多暇每與子婦輩演講列女傳教女遺規諸書氏久印腦海中矣無何舅姑與夫相繼歿氏年二十七歲所生二子一方毀齒一在襁褓薄田七畝不惟餽粥不給卽所飲之水亦有時缺乏嘗夏日承簷溜冬日溶積雪以作飲料鄰媪某曾與清水一盆氏終身感激不忘然舅所遺書籍圖畫加意保存曰待吾子若孫讀也又嘗撫書篋而歎曰累世書香將自此斷乎既又曰寧一日

一食不使吾子孫目不識丁也於是二子皆令讀書又皆令業農曰稼穡維寶古有明訓耕者不可不讀讀者亦不可不耕也自是以農致富家日饒裕孫曾輩遂肆意求學有畢業高小者有畢業中學者有畢業航空仕於京朝者每假期回籍聚讀一堂談說古今氏欣然曰數十年不聞此聲矣享年九十無疾而逝氏年五十歲時梅縣令表其門曰玉潔金堅八十時李少荃爵相奏請建坊立祠八十六時蔡縣令又表其門曰柏節松齡

沙烈女沙雲鵬之女也年十五許字張氏子未于歸而張氏子死女聞耗泣謂父母曰父母一許已定終身兒不能更適人明日當往殉也父母難之泣不已因勉從其志及至張氏家知姑與王姑皆孀居曰與其今日速死何如少盡婦道使無兒者知有婦也殯夫既已乃入厨營膳事姑與王姑怡怡如也百日往祭夫墓既歸是夜仰藥死

郭允信妻王氏年十七于歸時夫已抱病甚劇未幾卒葬之日投身於壙者再援之不出其姑親入壙中援之始出泣謂姑曰勿然兒爲姑苟活可也歸就姑宿跬步不

離奉事維謹年五十歲以疾卒邑令爲之請旌

王發祥妻趙氏發祥未娶時以墮坎傷足不良於行因遣人諷氏令改字氏聞之謂父母曰命也夫何言世烏有既許人猶可改字者卒歸發祥事夫恭謹絕無厭憎事翁姑尤孝不數年夫卒遺腹生一子撫之成立

監生張奉全妻田氏年二十九歲奉全亡上無翁姑淑慎自持和睦宛若教子讀書皆爲一鄉善士晚年孫曾滿堂家道亦日豐焉性好施與光緒二十六年大旱米價騰貴饑民枕藉氏出所蓄吉貝千餘斤使村人作織紡資本以布易粟全活甚衆民國九年寸禾未收元旦節貧家多不能食顛不校氏戚然悲之酌與麥粉使得度歲卒年八十一歲計守節五十二年儒學李表以節勵冰霜

宋學儒妻胡氏七歲奉佛不苟葷食肉蓋有根器人也嘗言既爲女子身卽不能不適人既適人卽不能保此清淨身吾其嫁一死夫乎年十四時適有陳村宋姓爲其亡兒娶生婦者氏遂嫁之其死夫卽宋學儒也于歸之後事姑極孝姑嘗臥病數年氏奉侍惟謹絕無厭倦又好談古事趣聞博姑歡咲姑若忘其無子焉者善鍼灸治

小兒無弗愈者暮年家境蕭條日止一餐不見有戚容蓋具妙明心能觀空一世者也

按德清俞蔭甫嘗謂粵中習俗往往有名門閨媛故嫁人家殤子爲之守節終身者名曰慕清可謂奇矣胡氏小家碧玉必不知粵中風尚而乃一意孤行爲此石破天驚之奇舉雖未必爲聖賢所許而實不能謂之不清也

劉秉燭繼室沙氏二十七歲翁與夫相繼亡氏生有二子長醇樸方五歲次醇玫猶在抱中也家又中落煢煢孤寡一室相依井臼自操艱苦萬狀至夜則機聲淚點相併於燈下二子稍長督責綦嚴小有違忤則鞭笞立下必使長跪而後已二子既長遂戒之曰人生不能自立必遭人白眼視讀書取青紫汝兩人似不相宜毛錐子與汝無緣盍託業於盤珠乎於是二子皆棄儒經商南販北賈多稟母命而行無不獲利倍蓰不數年乃富甲一邑氏壽至六十二而終

張三妻子氏族人張三妮以穢語相加氏羞憤自縊死光緒十九年旌

府志

高占魁繼室張氏二十四歲時占魁以瘵死屬纊之際家人環繞氏忽曰吾幾忘卻

吾夫有最愛之纏帶今將永訣吾爲檢出縛於脛上庶慰幽魂也言訖抱其所生小兒送於前室長女之懷曰汝暫隨汝姊可也匆匆去家人成歛已畢而氏猶不至徧覓不得久乃得於久無人到之室則已懸梁自盡矣一靈不昧蓋欲追其夫於九原也

民國

段文佐妻徐氏晉溪明經之女也通書算嫺禮節于歸時年十八歲未幾文佐兄弟析居祖產雖豐而文佐所得獨薄氏勸之事事退讓嘗云兄弟如骨肉財產如衣服人可以衣服保身體不可愛衣服傷骨肉也時值流寇猖獗一日闖入其里大肆蹂躪文佐少年氣盛怒罵不止遂遇害氏于是年二十八矣一子鷓甫二齡氏撫孤持家賴紡織以糊口艱苦備嘗而口不言苦及子鷓服官中州嘗勉以清官不愛錢公門好修行之語又致書誡之曰人窮志莫窮財短氣莫短汝雖一官落拓不可不守詩禮家風墮先人之遺訓也晚年好佛經蒲團打坐念珠不離于手周急卹貧惠洽閭里人皆以老菩薩老善人稱之卒年八十餘歲孫其澍陸軍中將今爲執政政府參

議其消亦官營長

郭春魁妻安氏民國十年陰歷十一月初三日有土匪數十人各持快銃突入氏家迫使造飯氏造飯訖而陰以毒藥入飯內卽逃出土匪食之皆嘔吐不堪有仆地不起者匪知爲氏所毒乃覓至鄰舍以刀刺之幾無完膚又燃以煤油至死罵不絕口時年三十有九春魁南馮莊人

劉文齡妻邴氏二十二歲夫亡後生一子曰寅茂薄田數稜仰事俯蓄亦良苦矣厥後寅茂成立家漸饒裕不憂飢寒焉乃至六十七歲時寅茂遺病卒子女都無所出氏早年哭夫老年喪子而天又斬其嗣可謂極人生之至慘矣繼念後嗣雖絕宗祠不可不立乃出京錢千緡爲族中購地建祠使劉氏先靈有所依託歲時致祭不歎餒而焉民國七年族人芳澤爲之呈請邑侯蔡劭甫轉呈黎大總統給以節勵松筠扁額嗚呼榮矣民國十年以疾卒壽七十二歲

楊藻春妻蕭氏十九歲于歸事翁姑以孝聞姑王氏歿後翁繼娶范氏氏事之一如事王氏者故家庭和睦絕不聞勃谿聲民國十一年偶患乳癰遂移居城內就醫調

治至臘尾創漸平業起牀矣詎至十二年正月夫藻春勦匪南區炸死於警局之中氏在城聞耗痛不欲生晝夜哭泣不飲不食誓殉所天其創之業已就愈者至此復發而死二月十二日與其夫合葬焉

孟節婦不知何許人幼喪父母五歲時爲人所略賣經威境之余官營憩於茶肆村人杜長清本馬氏子而後於余氏者也家有瘠田數畝二女三子俱未議婚是日見小女坐車中頗端靜知其爲販鬻者遂以京帑十千買歸以爲次子童養妻卽節婦也無何次子病殤女纔十有一歲耳長清思己子已死此女猶未廟見無夫婦名分終身將安歸乎不如認爲義女爲之論婚他族而心始安也於是託鄰媪致意於女女淚如泉湧謂媪曰吾旣入馬氏門卽爲馬氏婦吾安所歸乎吾願終身孝養父母不出馬氏門一步也長清從此視女如生女女亦視長清夫婦如所生焉冰霜之操至死靡他一鄉之人無不憐而敬之長清夫婦歿後馬氏族入爲女立嗣扁其門曰蘭閨正氣民國十一年以壽終年七十八歲蓋名爲節婦而實貞女也

劉慶身妻李氏事威姑以孝聞人無間言民國九年十一月有土匪數十人乘夜突

入其家執慶身逼索金錢稍拂其意卽以刺刀斫仆地上氏踣而爲夫乞命不得請
乃以身護其夫匪怒而斫氏之左手左手傷又斫氏之右手墮三指焉氏仍不去匪
又斫其首部血汨汨下注斯時兩人之血互相沾濡模糊淋漓宛轉於血泊中莫辨
孰夫而孰婦也匪去後家人延醫敷藥月餘而慶身始起牀氏氣息奄奄半載後亦
竟無恙論者謂氏以弱女子爲夫捍患挺身而犯強寇冒白刃而無所於懼可謂丈
夫女矣

荆振江妻李氏二十歲于歸生男二皆不育三十歲而夫亡氏一慟幾絕欲以身殉
家人以姑在須養喻之乃止氏寡言咲善持家終歲勤苦紡紉無間嘗語人云人貴
自立吾雖婦女豈肯累人耶民國四年卒年四十八

胡廷瑞妻孟氏十八歲于歸三年夫亡生一女甫周晬前室遺一子名孟桂始七齡
氏上事舅姑下撫兩孤孩家又窶且貧斯亦生民之至艱荼毒之極哀也未幾姑卒
不能具棺殮氏終夜涕泣叩頭街陌始得歛錢以葬焉繼而翁以虧短官債繫獄中
家產蕩盡氏夜則紡紗晝則拾林間落葉路旁衰草以供炊爨日常一飯或竟日不

得食而猶三時赴獄爲翁送飯有時風雨昏暮持籃徬徨獄門側見者莫不心惻監獄員曹君爲之言於縣令縣令轉呈上憲始得釋翁於獄至是蓋已三年矣出獄未久旋嬰痢疾氏親侍湯藥二十餘日愈而復病終以不起而卒當其翁之在獄也孟桂已迫學齡此時城中已設國民學校氏乃令孟桂入校教員以氏貧苦不忍受其學費今氏守志已逾二十年孟桂已畢業第四師範充當本縣教員鄉人靡不稱之張琛妻張氏二十三歲時夫患瘵疾屬纊前一日自知不起囑氏曰吾兩人情緣盡矣汝無子無女終身將安託乎吾死後汝必改適吾心始安不然者空閨弔影獨夜愴魂吾在九幽亦不瞑目也氏聞之淚下如綆縻嗚咽不能成聲良久曰脫有不諱翁姑卽吾所託也大地茫茫將安適乎夫也天只不諒人只言己又哭不成聲無何夫死氏遂父其翁而母其姑依依膝下二十年有若所生見之者不知其子婦也然而中元法食三月清明持一陌紙錢痛哭荒郊未嘗不哀感行路也

高連科與占魁同族其妻周氏二十四歲于歸翁姑已前卒惟一祖姑尙在氏克盡孝養姑亦特愛憐之二十八歲連科卒至是凡三娶竟無子惟氏所生一兩歲之幼

女耳氏此時心痛色和請於祖姑遍邀戚族同議立夫姪增年爲嗣及繼單已立殯期已定氏之形容乃日以枯槁漸成骨立發引之前一日氏忽於夜深在連科靈前痛哭家人勸之歸房抵明則聲消氣絕矣蓋氏於大事已定之後絕粒者已十有一日也此事與魏禧妻謝夫人事相同皆巾幗中之伯夷也

韓省玉妻王氏貧家婦而有姿首省玉傭畊遠方終年不歸翁亦佃人田以自給氏窮檐獨處有同嫠婦南鄰木工韓文德涎氏之色而又欺其獨居也乘夜懷刃入其室氏見之曰我家無男子爾黑夜來此意欲何爲因而怒批其頰文德見勢不佳忿火中燒遂出懷中刃刺之受創十七處倒血泊中而死文德緣樹越屋而去時夜已深無人知者次日縣知事周輝遠履驗例傳訊四鄰文德四鄰之一也周侯見其神色有異施以鈎距之術一訊卽服直言不諱其供詞云云

潘氏邑南關馮惇德之妻也生一子名尙錦氏年二十歲夫亡守節七十年子與孫亦相繼早亡氏晝夜織紡數十寒暑無間性耿介而慈和有猶子二長茂修次茂和得氏母教雖未爲氏後然事氏如己母也氏晚年好慈善尤嗜佛積紡織餘資周急

無吝色爲人家作達生術耄期不倦民國八年七月無疾而終年九十歲一鄉皆稱述焉

范崑妻劉氏烈士朋昭之女也二十八歲夫亡遺有二子長允執六歲次允懷四歲墓田數畝耕穫需人歲所收入不足供溫飽上有孀姑老且病氏託業績織勉奉甘旨教子以嚴持家以儉一燈一椀無間寒暑晚年二子皆成立腴田百餘畝一鄉稱富媪焉氏現年七十五歲計守志四十有七年矣

何春泰繼室逯氏春泰字舒和清光緒初年因辦理振務賞藍翎五品頂戴光緒十二年病故繼配逯氏年方二十五歲子嗣全無因以猶子作楫承嗣未幾作楫亡亦無子於是戚族會商又以作楫之猶子繼緒繼作楫娶媳劉氏生一子名彭年劉氏亡又娶孫氏生一子名錫年孫氏又亡復娶傅氏生子慶年芳年慶年三歲芳年未滿一週是歲卽光緒二十七年也虎疫流行死者相望繼緒夫婦同時病沒諸孤藐藐靡所依託均由逯氏撫養逯氏以青年孀婦迭遭變故艱苦備嘗經理家事惟勤惟儉教諸孫以義方命彭年學習農業命錫年赴保定肄業於高等巡警學校畢業

之後歷充警官及警佐所長等差慶年芳年均由高等小學畢業後經商務農各有營業不使有游閒焉民國九年逮氏卒享年五十有九

列女表

表之體昉於龍門史家遵而用之便檢閱也吾志之表列女亦猶是耳或謂表中首列郭后劉妃以天下之母儀帝王之嬪嬙而下與青年嫻嫻白髮窮嫗叅錯一紙得毋貴賤之不倫乎余曰不然后妃女也青年嫻嫻白髮窮嫗亦女也吾表其爲女耳非表其貴賤也且生當今之世爲民國之人而猶斤斤然於階級無乃不達時務况孟堅古今人表女媯象祖彤魚媯母女祿嬌極皆帝后也而乃與伯宗之妻聶政之姊同列一表之中後人無議之者吾何爲獨不然哉

姓 氏 立 節 年 守 節 年 旌 表 年 歲 有 無

魏

文帝郭后

魏志有傳

明

世宗劉妃

舊志有傳

李還妻蕭氏

十八

嘉靖五年旌
有傳

戚敬妻王氏

十九

六十餘

有傳

王曦妻白氏

二十六

三十餘

有傳

貢生賈瑄妻李氏

二十二

四十餘

有傳

孫珣妻薛氏

二十一

四十五

有傳

王子卿妻劉氏

二十一

四十餘

有傳

醫官王卿妻劉氏

二十九

三十餘

姊妹雙節

醫官王卿造室劉氏

二十二

三十餘

有傳

王欽妻馬氏

十七

六十餘

有傳

生員李文鳳妻王氏

二十五

五十餘

萬曆三十三年旌
有傳

王希皋妻黑氏

二十四

六十六

有傳

陳得禮妻趙氏

二十一

五十

萬曆中旌

生員 趙來儒妻董氏

二十九

五十餘

一門雙節

有傳

來儒子千里妻胡氏

二十

四十餘

表

龐之屏妻尹氏

二十三

四十餘

有傳

表

張學孔妻王氏

十七

六十餘

有傳

孫荷妻賈氏

二十九

五十

有傳

旌

沙宗巖妻郭氏

二十

四十餘

王邦妻張氏

十九

四十八

賀得時妻賈氏

二十四

四十餘

旌

張次璧妻趙氏

二十

四十餘

天啟間

旌

孫蒼妻王氏

崇禎十二年
有傳

旌

賈紹庭妻孫氏

有傳 戊寅殉難

張國翰妻李氏

有傳 戊寅殉難

旌

王欽恩

繼母司氏
妻高氏

縣令張楷表
有傳

趙岫母樊氏繼室王

三十

有傳戊寅殉難

李庭蕙妻王氏

四十餘

妯娌同心苦節巡按

李庭芝妻呂氏

二十三

四十餘

爲之請旌

李庭范妻張氏

二十五

四十餘

張鳳儀妻夏氏

有傳

清

王彥髦妻董氏

十九

六十四

巡按表其門

王鳳苞妻劉氏

二十五

六十餘

有傳

龐疆妻呂氏

五十餘

縣令張楷表其門

張昆妻賈氏

康熙四十八年旌
有傳

王勰妻張氏

十八

四十餘

旌

郭崇城妻沙氏

二十六

四十八

有傳

崇城子文燦妻李氏

十九

七十三

姑媳雙節
並旌

趙忠蘊妻郭氏

二十七

五十二

有傳

旌

朱正色妻呂氏

二十

四十餘

縣令劉德表其門曰節茂松筠

有傳

王連妻董氏

三十

五十

縣令盧豪然表其門曰萬里堅貞

有傳

劉廷桂妻范氏

十七

四十餘

學政錢陳羣表其門曰全貞啟後

有傳

趙之牧妻賀氏

十七

四十餘

姑媳雙節

有傳

之牧子媳周氏

姑媳雙節

並旌

生員宋僑妻季氏

十八

五十七

學政劉燾表以古井無波

夏際祥妻王氏

十九

終身

乾隆壬子建坊入祠

段士魁妻張氏

十九

三十餘

總督表門

舊志

趙謙妻王氏

總督表門

幾輔通志
有傳

李成德妻魏氏

十七

五十七

已旌

張福統妻楊氏

二十五

四十九

有傳

剛成仁妻尼氏

十八

四十

有傳

李鳳彩妻張氏

二十五

二十九

已旌

李良選妻王氏

二十三

五十七

縣令吳師郊表其門曰
冰雪爲心有傳通志

郭靈杰繼室王氏

二十三

有傳

張步月妻王氏

二十二

五十二

已旌

高增輝妻張氏

二十一

六十

已旌

李登立妻劉氏

二十

五十五

已旌

段清輝妻郭氏

四十三

清輝弟清剛妻王氏

一門貞節

同旌

清輝子玉合妻張氏

四十四

張熙皋嫂宓氏

乾隆朝旌門建坊

生姜振儒祖母王氏

學政劉墉表其門曰節操松筠

高增勇妻李氏

二十三

四十三

已旌

劉多潤妻陳氏

二十五

五十一

已旌

姜德泰妻方氏

縣令張表以苦節自甘

李金棟繼室賈氏

二十

五十二

縣令表其門

張國泰妻武氏

嘉慶二十二年縣令表其門

劉和玉妻陳氏

二十六

二十五

學政沈表其門曰松貞荻調

趙鑄妻范氏

十八

三十二

有司表其閭

徐三戒妻郝氏

二十六

五十六

道光三十年旌

賀振清母劉氏

二十五

四十五

縣令表其門

沙中玉妻劉氏

二十三

三十六

學政程表其門曰節砥松筠

魏德聚妻呂氏

二十二

四十

咸豐二年旌

劉錫祉妻李氏

二十三

四十

已旌

徐書業妻李氏

二十七

二十

張朝文妻王氏

二十

二十

縣令表門

翁咸臨妻謝氏

二十九

三十二

已旌

翁自隆繼室趙氏	二十四	三十四	已旌
翁泮妻姜氏	二十八	四十三	
翁泮妻周氏	二十二		已旌
潘士瑞妻李氏	二十六	五十	
王來獻妻李氏	二十四	五十	
李福妻王氏	二十三	四十九	
劉良楷妻馬氏	二十四	四十七	
傅廷現妻張氏	二十七	四十六	
高鍾秀妻王氏	二十一	四十六	
戚恒謙妻王氏	二十四	四十三	
王祥麟妻劉氏	二十九	三十七	
陳丕成妻劉氏	三十	四十	
丕成子文章妻趙氏	二十一	四十九	姑媳並勵貞操

陳宏謨妻蘇氏

二十

三十七

葛夢德妻蘇氏

二十

三十六

趙忠妻常氏

二十五

三十五

趙清林妻李氏

二十五

三十五

趙連勳妻賈氏

二十八

三十三

王修善妻陶氏

二十九

三十三

趙玉妻史氏

三十

三十二

馮文斗妻劉氏

二十三

三十二

石梓妻張氏

二十二

三十二

尙振聲妻莘氏

二十五

三十一

叢珮琪妻趙氏

二十四

三十一

桑潤田繼室賈氏

二十四

三十一

張重麟妻李氏

二十四

三十一

王雲同妻王氏 二十六 二十五

以上二十四人咸豐六年縣令欽曰棠俱表其門

郝鳴球母王氏 二十五 三十二

董清選妻張氏 二十二 三十二

上以二人咸豐七年縣令表其門

劉文燦妻胡氏 十九 二十八

孫鶴齡妻武氏 二十八 二十二

郭培元妻李氏 十九 四十九

咸豐十一年旌

陳維新妻孫氏 二十二 三十四

同治元年旌

高勸勸妻張氏 二十七 三十四

王允恭妻張氏 二十一 三十

同治元年旌

許飛龍妻石氏 二十三 三十

同治元年縣令表其門

郭維楨妻王氏 二十五 四十五

同治四年縣令表其門

潘茂妻蕭氏 二十五 五十四

同治八年縣令表其門

吳名金妻宋氏 二十七 四十九

同治九年大順廣道旌表

張崑妻王氏	二十九	四十	大順廣道表
周治明妻王氏	十七	三十五	同治九年旌
王清智妻陳氏	二十五	三十五	大順廣道表
戚金箱妻張氏	二十八	三十一	同治九年旌
徐灑妻房氏	二十七	二十七	同治九年大順廣道錢表其門
馬錫朋妻張氏	二十三		同治九年旌
張丙辰妻郭氏			同治九年大順廣道錢表
鄭挺生妻孫氏	二十	六十	同治十年旌以苦節甘 臨直督表以苦守冰霜
李榮曾妻宋氏	二十	四十	同治十年旌
戚恒言妻張氏	二十八		同治十年旌
李璣妻張氏	十九	四十	同治十年旌
張長春妻李氏	二十六	四十五	同治十一年旌
黃士昆妻郭氏	二十四	三十四	同治十一年旌

張平治妻趙氏

二十

六十

同治十二年旌

翟洛琦妻高氏

二十四

五十

並同治十二年旌

洛琦子慶年妻楊氏

十七

三十二

高錦瑞妻劉氏

二十九

四十七

同治十二年旌

趙九思妻張氏

二十八

三十七

光緒二年縣令表門

袁銘西母姜氏

光緒三年縣令表門

王鳳化妻王氏

二十七

三十

郭遐齡妻鄭氏

二十二

光緒六年表門

王辛酉妻馬氏

有傳

譚五禎繼室陳氏

二十九

四十八

張汧妻張氏

二十七

三十六

年八十合肥李爵相爲之
請旌建坊立祠 有傳

鄭德有妻焦氏

二十五

五十七

王子元妻魏氏

二十七

五十四

李登榮妻劉氏

二十四

四十九

光緒十三年縣令表

李長青妻楊氏

三十

四十八

光緒十三年表

徐文彬妻韓氏

二十五

二十二

光緒十三年旌

翟廷福妻郭氏

二十三

三十七

光緒十四年表

莊金榮妻王氏

十九

三十一

光緒十五年表

龐舒廷妻張氏

二十八

五十一

光緒十六年旌

龐萬齡妻范氏

二十七

四十四

光緒十六年旌

魏文明妻王氏

二十八

三十五

光緒十六年表

王桂林妻賀氏

十六

三十五

光緒十六年表

劉國傑妻劉氏

二十二

六十九

光緒十八年表

張廷襄妻楊氏

二十七

六十三

光緒十九年表

郭斗魁女

年二十一母亡誓以身殉越二日死之

張鳴皋妻李氏

二十二

六十二

郭雲章妻郭氏

二十

五十八

有傳

張正運妻趙氏

二十六

五十八

有司表門

李不猷妻王氏

二十八

五十三

趙雙祥妻高氏

十七

四十五

學政孫表

董生華妻楊氏

二十九

四十四

易時熙妻姚氏

二十五

四十一

柴克明妻侯氏

二十八

四十餘

文生徐光岱妻李氏

二十八

三十五

已旌有傳

光岱子塘妻李氏

守節教子克肖其姑

薛建德妻賀氏

二十

三十四

遂繼武妻趙氏

二十五

三十餘

王統增妻高氏

二十三

二十七

請入旌祠

馮福昌妻趙氏

二十九

二十七

潘連妻賈氏

二十七

終身

文薛乾元妻孫氏

二十七

光緒十九年儒學表以苦節徵音

薛璿妻王氏

十九

建坊入祠

呂良魁妻楊氏

十九

六十

張淑性妻徐氏

十八

五十九

崔學海妻王氏

二十四

五十六

王永和妻徐氏

二十

五十五

王兆慶妻張氏

二十八

五十餘

石興業妻李氏

二十三

五十

張河圖妻陳氏

三十

四十八

馮須純妻周氏

三十

四十七

沈德著母張氏

十九

四十六

張洽妻蘇氏

二十九

四十餘

項乘鱗妻趙氏

二十四

三十九

徐鈴妻王氏

二十二

三十

張金聲妻郭氏

二十

三十

蘇潔清妻劉氏

二十二

六十五

王克勳妻安氏

二十四

六十二

廣平府知府表以志凜柏舟

王龍章妻鄭氏

二十八

六十

張立名妻王氏

二十

五十四

學政繼表以松貞鶴壽

蘇萬太妻孫氏

二十一

五十七

張萬選妻崔氏

二十一

五十六

唐志正妻劉氏

二十四

五十五

剛卓元妻李氏

二十一

五十四

宋朝貴妻孫氏

二十

五十二

楊允生妻趙氏

二十八

五十二

田永清繼室李氏

二十二

五十餘

劉和順妻張氏

二十八

五十

賈章齡妻王氏

二十八

五十

石璞妻劉氏

二十七

五十

葉維茂妻張氏

十九

五十

石存樸妻王氏

二十九

四十六

王鳳勳妻李氏

二十六

四十六

陳宗賢妻李氏

二十五

四十六

邢福泉妻王氏

二十三

四十五

張祥齡妻趙氏

二十九

四十四

劉成林妻劉氏

二十一

四十四

翁祥臨妻高氏

三十三

四十四

生員 張開泰妻劉氏

二十六

五十四

楊維新妻姜氏

二十三

四十

蘇延標妻秦氏

二十九

三十九

李學林妻張氏

二十

五十六

王鱗柱妻吳氏

二十六

三十八

王統豫妻劉氏

二十九

三十五

邢金銘妻高氏

二十八

三十四

剛慶元妻賈氏

二十八

三十三

尹秀雲妻劉氏

十七

十五卒

有傳

張永昇繼室樂氏

二十二

五十二

有傳已旌

和淦女

有傳

陶洵女

郭文法妻王氏

二十二

六十二

劉維城妻傅氏

二十七

三十二

卷十一

四十七

北平京津印書局印

劉維範妻劉氏

二十三

三十二

縣令表門

張安法妻王氏

二十四

三十二

高文會妻段氏

二十

二十三

李培林妻鄭氏

十九

三十一

高其昌妻楊氏

二十九

三十

王耀魁妻馬氏

二十三

三十

邢金麗妻楊氏

二十六

二十八

馬景忠妻潘氏

二十三

二十七

徐州鼎妻王氏

二十三

十二年卒

張三妻子氏

光緒十九年旌

翁題元妻王氏

十六

五十

有傳 已旌

張恒菊妻劉氏

二十

四十九

有傳

胡雲驥妻王氏

二十八

二十六

李福興妻董氏

二十四

二十五

李清儒妻郭氏

三十

二十一

有傳

李保泰妻畢氏

十八

四十二

武清偉妻翟氏

有傳

項增裕妻王氏

二十

有傳

諸生王炳森母史氏

二十一

六十六

有傳

項福昌母趙氏

二十

楊敦倫妻鞏氏

十九

四十一

袁合法妻房氏

二十八

三十七

諸生楊義上妻王氏

二十六

三十二

陳維基妻張氏

二十三

四十一

李殿傑妻趙氏

二十六

三十一

李清選妻陳氏

二十八

三十二

王太勤妻呂氏

十九

三十八

李鳴鶴妻石氏

二十二

三十

有傳

李應魁妻范氏

二十五

六十一

衛千總
李應斗妻蘇氏

二十九

三十九

應斗子培材妻鄭氏

二十三

二十八

鄭秉仁妻岳氏

二十九

五十八

趙松年妻李氏

二十六

五十六

諸生唐英華妻劉氏

二十八

三十八

郭春桂妻孫氏

二十四

二十四

趙三光妻陸氏

十七

有傳表

魏振聲繼室王氏

二十七

三十五

振聲子
諸生名儒妻侯氏

三十

二十五

有傳一門三節婦

振聲子名高妻蕭氏

二十八

四十一

陳元貴妻馮氏	二十三	二十四	
章安宅妻潘氏	二十四	四十五	
趙明理妻周氏	二十四	三十九	
張慶和妻宋氏	十九	六十	
楊作肅妻尙氏	二十	二十四	已旌 光緒二十六年入城內西街節孝祠
張步月妻劉氏	二十五	五十一	已旌與前所載之張步月妻另爲一人
陳五會妻白氏	十八	五十七	已旌
宋學孟妻王氏	二十四	三十	
宋墨林妻路氏	二十六	三十七	
郭同風妻某氏	二十六	四十一	
何忠傑妻張氏	二十九	四十四	儒學李表以勵節冰霜
韓新元妻赫氏	二十六	二十七	
韓九霄妻馮氏	二十五	四十一	

王臣良妻馮氏

十九

五十七

王臣俊妻韓氏

二十四

五十三

韓志明母牛氏

三十

四十四

李元三妻張氏

十八

二十三

王有鵝妻劉氏

十八

五十二

趙寶泰妻崔氏

二十一

二十四

趙學孟妻朱氏

三十

二十三

尙登科繼室趙氏

有傳

秦立鶴妻劉氏

二十四

五十七

光緒二十二年建坊入祠

趙得中妻田氏

二十二

二十九

光緒二十九年縣令表門

王明月妻沈氏

二十七

四十七

光緒三十二年旌

王濯錦妻崔氏

二十三

五十

前清周學使表以潛德幽光

魏得聚妻呂氏

二十三

三十

前清學使表

郭治安妻司氏 二十一 四十五

解永年妻劉氏 二十一 六十一

監生張淳妻李氏 二十 六十 表

諸生張治妻邵氏 三十 三十三 光緒間請旌建坊

文童高凌嵐妻胡氏 十七 五十四 宣統元年表以貞婦孝婦

王子元妻魏氏 二十六 五十四

黑際龍妻張氏 二十三 四十五

馮清本妻呂氏 二十六 四十二

陳洪範妻郭氏 二十二 四十五

呂景來妻趙氏 十八 六十

劉一善妻柳氏 二十六 四十五

周文明妻孫氏 二十四 四十一

監生趙鳳春妻丁氏 二十六 五十六

武生陳飛龍妻張氏

二十六

四十六

石含輝妻董氏

二十四

五十

石潔清妻王氏

二十七

二十三

周成章妻梁氏

二十二

二十九

李景樸妻周氏

二十二

三十五

孫興元妻郝氏

十九

六十三

孫榮德妻徐氏

二十九

三十三

李元林妻張氏

二十三

二十七

李殿祥妻楊氏

二十七

二十三

袁江妻黃氏

二十九

五十八

胡榮妻耿氏

三十

三十二

蘇昭聞妻魏氏

二十九

三十七

伊佩玖妻王氏

二十六

五十四

方汝翼妻郭氏

十八

四十

縣令岳表

王瑤琴妻夏氏

十九

五十九

王波妻戚氏

二十三

三十三

張同會妻陳氏

二十六

五十九

張鳳祥妻李氏

二十七

四十七

高泰鴻妻陳氏

二十四

四十一

管登科妻戚氏

十九

五十八

牛秀芝妻劉氏

二十五

二十六

牛秀芸妻某氏

二十七

二十四

董宗瓚妻吳氏

二十五

五十五

董文學妻李氏

二十七

五十

趙本立妻陳氏

二十二

五十五

蘇廷栗妻秦氏

三十

三十五

蘇慶三妻孫氏

二十四

四十四

魏文明妻王氏

二十九

五十一

魏相知妻劉氏

二十九

五十二

潘德元妻尹氏

六十

有傳

徐承緒妻張氏

有傳

趙三峯妻王氏

二十九

三十五

劉澤潤妻單氏

二十六

三十四

侯耀宗妻張氏

二十八

四十七

侯瀛洲妻劉氏

二十六

二十卒

侯克立妻王氏

十八

四十五

侯克壯妻楊氏

二十

三十

劉潤珏妻龐氏

二十六

四十卒

任長在妻李氏

三十

三十

張五星妻李氏

二十一

四十三

孟夢齡妻蘇氏

二十

六十

張氏子妻沙氏

夫亡後始于歸百日住祭夫墓歸而仰藥死有傳

蘇多成妻子氏

三十

三十四

郭連璧妻孫氏

二十二

二十九

田玉琢妻張氏

十九

終身

旌

秦文明妻范氏

二十七

終身

魏從善妻鄭氏

二十七

三十七

魏擇善妻楊氏

三十

二十五

張振中妻許氏

十九于歸數日夫死

三十三

張青龍妻顧氏

十九

五十四

孟建維妻高氏

二十九

三十一

孟一英妻高氏

二十

三十八

孟松齡妻鄭氏

二十一

六十一

李文思繼室賈氏

三十

二十

和琳妻王氏

二十八

二十七

王汝義妻石氏

二十五

五十五

文王培梓妻李氏

二十七

四十一

李際隆妻樂氏

二十

四十六

王某妻施氏

十六

六十七

旌

妻甫三日王歿氏守節至八十三歲卒

袁思俊妻申氏

二十八

四十八

馬新春妻張氏

二十六

四十三

馬新法妻馬氏

二十四

二十四

孫鑑妻高氏

二十三

三十一

張清明妻張氏

十六

五十一

旌

劉清波妻劉氏

二十六

二十六

韓儒雅妻王氏

三十

五十

頁生徐俟實妻李氏

二十

三十八

武生劉德魁妻張氏

二十七

五十七

徐光宇妻趙氏

二十六

三十八

徐瑄妻張氏

二十九

五十八

生員徐雲鶴母周氏

二十九

四十

表

監生徐貢雪妻尼氏

二十二

四十

張均妻韓氏

十七

四十二

王興文妻吳氏

二十四

終身

何松齡妻趙氏

二十三

三十五

柴永武妻王氏

二十

五十五

旌

夏登洲妻賈氏

二十五

五十六

桑瀛山妻陳氏

二十五

三十五

大順廣道錢表

張諮妻劉氏

二十三

四十

夏安祥妻梁氏

二十三

四十七

高玉閣妻段氏

十七

二十四

周成章妻梁氏

二十二

二十九

李光榮妻劉氏

十九

夫亡絕粒而死有司請旌建坊入祠

岳璞玉妻劉氏

二十八

四十七

岳萍妻吳氏

二十七

四十八

李清祺妻馮氏

二十二

五十三

馬福海妻周氏

二十一

三十八

霍宗禹妻王氏

二十三

五十二

劉陰春妻楊氏

二十三

三十一

單福全妻盧氏

三十

三十二

王珏妻王氏

二十八

四十四

王振海妻李氏

二十二

三十二

王培蒸妻范氏

二十二

三十二

趙廣業妻閻氏

二十四

五十五

宋鳳池妻王氏

二十

二十三

劉占熬妻李氏

二十四

四十九

張萬和妻邢氏

十六

二十一

儒學表

郭金城妻郭氏

二十二

三十八

縣令表以矢志貞潔

耿知學妻劉氏

二十一

三十一

管舒才妻郭氏

二十一

四十九

生員王化隆妻王氏

二十七

四十三

文童王化溥妻方氏

二十四

四十七

趙文豪妻韓氏

三十

四十

趙朋武妻郭氏

十九

五十

李彩興妻宋氏

二十九

二十九

宋修和妻安氏

二十

二十

表

宋修文妻邢氏

二十五

四十六

張文德妻周氏

十八

三十三

王振海妻劉氏

三十

二十一

李翰卿妻李氏

二十六

十八卒

趙永興妻宋氏

二十

三十五

張存忠妻魏氏

十八

三十一

韓金玉妻張氏

二十五

四十六

張新成妻劉氏

二十七

五十四

王明倫妻范氏

二十八

四十五

劉景春妻楊氏

二十一

三十一

牛萬程妻侯氏

三十

劉鳳九妻張氏 二十五 二十八

歲貢魏錫桓母張氏 二十七 四十一

學政張表以節高形史

生員沙岳妻馬氏 二十九 五十三

張廷煥妻馬氏 二十七 四十五

武生王國泰妻賀氏 三十 三十四

王德修妻遂氏 二十二 五十三

劉玉爲妻張氏 二十 四十五

申廣順妻李氏 二十六 四十

張登嶽妻王氏 十九 二十卒

秦清秀妻侯氏 二十九 三十一

劉桂聲妻范氏 二十八 三十三

宣統三年表

鄭際隆妻袁氏 二十三 二十一

鄭紹唐妻韓氏 二十四 二十二

縣令張表以玉潔冰清

張安法繼室王氏

二十八

二十五

前已有張安法此另爲一人

張安爵妻韓氏

二十七

三十四

牛秀琳妻劉氏

二十二

五十

王國芳妻任氏

十八

二十九

劉琴堂妻任氏

二十九

二十一

戚來臣妻張氏

二十八

五十二

宣統三年表

宋鳳均妻張氏

二十四

四十二

宋修己妻王氏

二十八

四十六

劉夢龍妻傅氏

二十八

五十六

胡振英妻張氏

二十三

四十二

表

谷德和妻王氏

二十

四十

趙玉元妻武氏

二十

四十四

田青玉妻王氏

二十三

四十八

生薛佩珍母趙氏

三十

四十

尙金銘妻辛氏

縣令王表以彤管流輝

張廣生妻董氏

二十九

郭允信妻王氏

十七

三十三

旌有傳

王發祥妻趙氏

有傳

生張奉全妻田氏

二十九

五十二

表有傳

劉秉燭妻沙氏

二十七

三十五

有傳

宋學儒妻胡氏

有傳

高占魁妻張氏

二十四

二十四

孔憲恩妻王氏

二十四

四十五

賀淑元妻趙氏

十九

五十一

賀宗泰妻王氏

二十三

三十三

賀德顯妻王氏

二十九

三十

劉九齡妻張氏

二十一

三十七

劉盡方妻李氏

二十八

四十三

劉芳徽妻姬氏

二十二

三十六

備學李表

李鴻文妻徐氏

十八

二十三

張廷玉妻葛氏

二十九

四十七

張廷鑑妻莊氏

二十二

六十一

張泰謙妻張氏

十九

四十一

趙春堂妻羅氏

二十三

二十六

表

張梓妻劉氏

二十一

四十

程步瀛妻王氏

二十九

二十七

表

高烜妻 氏

二十二

五十一

尼經魁妻李氏

二十二

五十二

學政周爲之請旌

宋立行妻高氏

十九

終身

學政張爲之請旌建坊入祠

諸生劉淮浦妻王氏

三十

四十六

劉延齡妻蔡氏

十五

四十

儒學李表

張緒妻李氏

姑病思肉割股以進
縣令表以純孝回天

劉吉順妻高氏

二十二

六十

于鳳泰妻安氏

十八

三十二

魏長春妻潘氏

二十三

三十九

谷霞妻宋氏

二十三

二十二卒

嫁甫七十日而夫亡

徐長洲妻劉氏

十八

四十四

李雲禎妻趙氏

十七

六十七

李芳林妻張氏

十九

四十四

孫安居妻焦氏

二十七

三十一

李德成妻魏氏

十七

五十七

劉和玉妻陳氏

二十六

五十

舉政沈表以松貞荻訓

武翁磐妻姜氏

二十八

五十八

縣令表以撫孤全祀

石存樸妻王氏

二十四

五十二

表

中華民國

鄭際雲妻胡氏

二十六

二十一

王恒信妻閻氏

二十四

三十

劉鳴謙妻燕氏

二十四

四十三

徐大總統旌 今存

^恩劉錫朋妻郎氏

二十四

六十

^附李連棟妻張氏

二十八

三十

今存

李望泰妻尙氏

二十三

二十

高慶凱妻郭氏

二十五

三十七

黎大總統旌

武承經妻王氏

二十八

三十四

縣長周表

許蓬塘妻蘇氏

二十五

三十六

縣長周表

李能哲妻王氏

二十六

三十三

焦長信妻徐氏

三十

三十二

今存

韓省玉妻王氏

以拒姦遇害有傳

孟節婦

爲孀夫守節終身有傳

王鑑妻韓氏

二十九

二十七

鄉里表以垂範百世

魏慎徽妻王氏

二十九

三十三

張蔭亭妻錢氏

二十三

五十存

于耀庭妻修氏

二十四

十六卒

黃萬年妻劉氏

二十四

四十六卒

翟洛璉妻劉氏

表

周奉先妻燕氏

二十一

三十二

任燦然妻魏氏

二十六

二十五

鄭際明妻孫氏

表

紀懷琛妻李氏

十九

四十六

徐大總統旌

郭身安妻周氏		二十九	民國九年縣長蔡表以巾幗完人
劉蘊富妻李氏	二十七	二十八	請旌建坊 有傳
單富貴妻魏氏	二十九	四十九	縣長謝表
單夢塘妻龐氏	二十八	三十二	縣長謝表
于芬妻王氏	二十一	二十五	民國十年表
楊藻春妻蕭氏			殉夫而死有傳
劉慶身妻李氏			以捍夫爲土匪所傷死而復蘇有傳
荊振江妻李氏	三十	二十八	有傳
張琛妻張氏	二十三	二十	有傳
胡廷瑞妻孟氏	二十一	二十	有傳
柴觀治妻侯氏	二十四	五十四	黎大總統旌
郭春魁妻安氏			以毒匪遇害有傳
高連科妻周氏	二十四		殉夫而死有傳

柴省己妻許氏

十七

四十七

黎大總統旌

王培梧妻邢氏

二十五

四十八

王紹尹妻賈氏

二十三

四十

高文炳妻龐氏

三十

三十

高世泰妻曹氏

二十四

二十四

今存

解太安繼妻賀氏

二十八

二十

賈德亮妻王氏

二十三

五十七

今存

段文佐妻徐氏

二十八

五十二

有傳

馮惇德妻潘氏

二十

九十卒

有傳

范崑妻劉氏

二十八

四十七

今存
有傳

王漳妻石氏

二十六

五十四

今存
縣長周表

劉鳳燿母尹氏

二十八

五十七

今存
縣長周表

生劉秉書繼妻石氏

二十九

三十一

今存

趙雲會妻劉氏

二十

三十二

民國七年內務部發給白綾銀質褒章證書
今存

胡光海妻王氏

二十九

四十二

民國七年內務部發給白綾銀質褒章證書
今存

王常山妻柴氏

二十六

十五年卒

張紹齡妻高氏

二十八

二十七年卒

李汝梅妻孫氏

二十三

二十七年卒

和茗芳繼妻安氏

二十七

二十年卒

葛玉然妻李氏

二十三

五十一年卒

葛錫文妻董氏

二十九

四十八年卒

王玉書妻張氏

二十五

四十八年卒

董逢昌妻趙氏

二十六

五十四年卒

劉蔭棟妻王氏

二十四

三十四年卒

張有志妻張氏

二十

二十五年卒

劉長和妻李氏

二十二

三十四年卒

王五臣繼妻李氏

三十

四十三年卒

王永曾妻邢氏

二十七

三十九年存

王樹禮妻趙氏

二十五

三十年存

王鴻才妻王氏

二十五

二十六年存

魯連城妻子氏

十九

三十三年存

柴省耕妻郭氏

二十七

二十年存

趙濱清妻張氏

十八

三十六年存

沙玉妻傅氏

二十四

二十六年存

郭恒秀妻楊氏

二十五

三十三年存

何春泰繼妻遂氏

二十五

三十四年卒